

光緒江西通志

江西通志卷一百四十九

列傳十六

吉安府五

明

郭宏化字子弼安福人嘉靖進士除江陵縣徵授御史
十一年冬彗星見宏化言天文志并居東方其宿爲木
今者彗見於井則土木繁興所致也臣聞四川湖廣貴
州江西浙江及真定府之采大木者勞苦萬狀應天蘇
松常鎮五府方有造磚之役民間耗費不貲密戶逃亡
過半而廣東以采珠故激民爲盜攻劫會城皆足戾天
和干星變請悉停罷則彗滅而前星耀矣帝怒曰采珠
故事也朕未有嗣以是故邪黜爲民穆宗立贈光祿少

卿明
史

曾存仁字懋遠吉水人嘉靖進士授禮部祠祭主事會建世廟光祿丞何淵上議請由太廟道東出而達世廟存仁上言毀太廟垣亭翦伐文皇帝所植松柏震驚列聖之靈非達孝忤旨賴救獲免出爲浙江參議中官崔成督視開礦所在擾民存仁痛抑之成怒具奏逮詔獄尋起廣西參政時兵士歲餉缺乏存仁請緩外輸以給兵食富川故與峒獠爲鄰大吏行部率不至存仁躬臨之教以耕作畜牧官終雲南布政使

人物志

歐陽德字崇一泰和人甫冠舉鄉試之贛州從王守仁學不應會試者再嘉靖二年策問陰詆守仁德與魏良弼等直發師訓無所阿竟登第除知六安州建龍津書院聚生徒講學入爲刑部員外郎六年詔簡朝士有學

行者爲翰林乃改編修遷南京國子司業尋改尙寶卿
召爲太僕少卿以便養復改南京鴻臚卿父憂服闋留
養母以薦起故官累遷吏部左侍郎兼學士掌詹事府
母憂服未闋卽用爲禮部尙書喪畢之官命直無逸殿
時帝惑陶仲文二龍不相見之說諱言建儲德懇請會
有詔二王出邸同日婚德以裕王儲貳不當出外又言
會典醮詞主器則曰承宗分藩則曰承家今裕王當何
從帝不悅曰旣云王禮自有典制如若言何不竟行冊
立邪德卽具冊立儀上帝滋不悅然終諒其誠婚亦竟
不同日當是時德與徐階聶豹程文德並以宿學都顯
位於是集四方名士於靈濟宮與論良知之學赴者五
千人都城講學之會於斯爲盛德器宇溫粹學務實踐

晚將柄用而遽卒贈太子少保諡文莊明

史

劉學朱字述亭廬陵人少孤性穎而醇爲諸生遂以理學自任嘉靖領鄉薦二兄繼歿學朱上奉寡母下卹兩姪孝慈惟謹授桃源教諭歷升南京兵部郎中致仕歸與塘南王時槐主席西原一以講學爲事易簪日出二絕以示門人斂手而逝

人物志

周延字南喬吉水人嘉靖進士除潛江知縣改新會擢兵科給事中時議新建伯王守仁罪將奪其爵延抗疏爲訟坐謫太倉州判歷南京吏部郎中出爲廣東參政撫安南征黎寇皆預有功三遷廣東左布政使以右副都御史巡撫應天靖海寇林成進兵部右侍郎歷南京右都御史吏兵二部尙書嘉靖三十四年召爲左都御

史延顏面寒峭砥節奉公權臣盜柄政以賄成延未嘗

有染居臺端七年卒贈太子太保諡簡肅

明史

劉逢愷泰和人嘉靖進士令慈谿明達善斷庭無留獄有婦與所私殺其子反以賊殺求治逢愷察婦無戚容心疑訊之吐實同郡諸邑以慈獨無山稅請均逢愷曰山已采茶入貢故寬上供尺土耳如稅當平等茶請均之諸邑語塞與諸生講南軒慈湖之學仕終太僕少卿

浙江通志

歐陽瑜字汝重學於王守仁守仁教之曰常欲然無自是而已瑜終身踐之舉於鄉不就會試曰老親在三公不與易也母死廬墓側虎環廬噪不爲動歷官四川參議所至有廉惠聲年近九十而卒

明史
歐陽瑜傳

羅洪先字達夫吉水人年十五讀王守仁傳習錄好之師事同邑李中傳其學嘉靖八年舉進士第一授修撰卽請告歸外舅太僕卿曾直喜曰幸吾壻成大名洪先曰儒者事業有大於此者此三年一人安足喜也居二年詔劾請告踰期者乃赴官尋遭父喪繼遭母憂十八年簡宮僚召拜春坊左贊善明年冬與司諫唐順之校書趙時春疏請來歲朝正後皇太子出御文華殿受羣臣朝賀時帝諱言儲貳臨朝事見洪先等疏大怒曰是料朕必不起也降詔切責遂除名洪先歸益尋求守仁學自天文地志禮樂典章河渠邊塞戰陣攻守下逮陰陽算數靡不精究邑田賦多宿弊所司以屬洪先精心體察弊頓除歲饑移書郡邑得粟數千石率友人躬賑

給流寇入吉安主者失措爲畫策戰守寇引去洪先雖
宗良知學然未嘗及守仁門恆舉寂然不動無欲故靜
之旨以告學人山中有石洞舊爲虎穴葺茅居之命曰
石蓮謝客默坐一榻三年不出戶隆慶初卒贈光祿少

卿謚文莊

明史先

謚一作文恭

曾忬字汝誠泰和人嘉靖進士授光澤知縣時王守仁
講學越中忬取道往受業在閩多善政調宰婺源闕紫
陽書院修韋齋祠報最擢吏科升兵科都給事上疏忬
夏言下錦衣獄已而得免尋放還家家居三十餘年隆
慶初有詔起用先朝才德之臣被擯斥者言路以忬名
上柄國者疑其老不任職不果召未幾卒所著有太平
邊策及廷諍錄詩文四卷

山居
草

郭宗臯字居弼萬安人嘉靖進士授庶吉士歷官兵部
尚書自入翰林雖專文學而於時政弛張輒能言其當
否逮佐樞密紀律森嚴卒贈太子少保諡康介

人物志

劉陽字一舒安福人少見王守仁語錄心好之遂如虔
學問守仁顧諸弟子曰此生清福人也嘉靖初舉鄉試
任碭山知縣擢御史世宗改建萬壽宮爲永禧仙宮百
官表賀陽曰此當諫不當賀也中官持章奏至故事南
面立各衙門北面受之受畢復如前對揖陽改揖爲東
向嚴嵩欲親之竟引疾歸推光祿少卿不起闕雲霞洞
於三峯與弟子談學蕭然如在世外著有洞語人倫外
史接善篇吉州正氣錄等書

明倫彙編
學案

劉曉字百光安福人舉於鄉王守仁官南京曉受業歸

集同志爲惜陰會吉安講席大興後爲新甯知縣有善

政解官歸

白志

劉教字見川廬陵人嘉靖鄉舉令廣平進諸生講良知之學以誠信感孚人心審編均徭闔邑稱平府頒其法於所部以爲式或有以賄進者麾而笞之擢刑部主事

直隸通志

陳昌積字子虛泰和人嘉靖進士授禮部主事直內閣管理誥敕升尙寶司丞兼五經博士以文名一時已而

罷歸著有兩湖集二十四卷

郭青螺集

周祿字以道廬陵人受業王守仁之門爲學以見過爲宗兵部尙書聶豹嘗館之於京邸有邊將求謁者祿峻拒之所著有大學約言二篇弟祉亦篤志向學以選貢

判肇慶

人物志

江右卷之二十一 吉安府

三

宋儀望字望之永豐人嘉靖進士授吳縣知縣民輸白糧京師輒破家儀望令諸區各出公田計役授田贍之禁火葬創子游祠建書院惠績甚著徵授御史巡鹽河東請開桑乾河通宣大餉道言河發源金龍池下甕城驛古定橋會眾水東流千餘里入蘆溝橋其閒惟大同卜邨有叢石宣府黑龍灣石崖稍險然不踰五十里水淺者猶二三尺疏鑿甚易時方行挖運率三十人致一石儀望疏至下廷議兵部尙書聶豹言河成便漕兼制敵騎工部尙書歐陽必進言道遠役重遂報罷尋省母歸還朝發胡宗憲阮鶚奸貪狀二人皆嚴嵩私人嵩由是不悅會考京察官坐以浮躁貶夷陵判官嵩敗擢霸

州兵備僉事請城涿州除馬戶逋稅進大名兵備副使
改福建與總兵官戚繼光合兵破倭張居正當國雅知
儀望才擢右僉都御史巡撫應天進右副都御史遷南
京大理卿改北被劾罷歸儀望少師聶豹私淑王守仁
又從鄉守益歐陽德羅洪先遊守仁從祀儀望有力焉
家居數年卒

明史

曾同亨字于野吉水人嘉靖進士授刑部主事改禮部
吏部隆慶初爲文選郎中薦用遺佚幾盡進太常少卿
請急去萬曆初起大理少卿歷順天府尹以右副都御
史巡撫貴州御史劉臺得罪張居正同亨臺姊夫也給
事中陳三謨欲並逐之奏其庸不任職遂移疾歸九年
京察拾遺勒休致居正卒起南太常召爲大理卿遷工

部右侍郎督治壽宮節浮費三十餘萬由左侍郎進尙書九門工成加太子少保力乞去詔乘傳歸久之起吏

部尙書大計持正不撓失執政意遂引疾加太子太保

致仕卒年七十有五贈少保諡恭端

明史 白志舊案同亨布政存仁子

胡直字正甫泰和人嘉靖進士初授比部主事出爲湖

廣僉事晉四川參議尋以副使督學政請告歸詔起湖

廣督學移廣西參政廣東按察使疏乞終養起福建按

察使卒於官年六十九直少駘蕩好攻古文詞年二十

六始從歐陽德問學年三十復從學羅洪先

明儒學案

鄒士元字志伊萬安人嘉靖鄉舉授蘄州教諭遷滕縣

令廉介自持知代州以憂去一意聖賢之學每與諸鄉

先生會講於青原白鷺砥切證悟時以篤行稱之

人物志

彭炳文字一蔚廬陵人敏智力學以明經授沔陽訓導

既宗良知更爲躬行之學其言曰學悅事也自學自悅

此所謂獨知之慊著有正學編洗心亭集禮經會要陳

嘉謨曾可耕皆其門人及卒郡邑祠祀之

人物志

劉方輿字龍山吉水人嘉靖鄉舉任廣西平樂推官多

惠政忤議挂冠著有關中隨筆

人物志

郭春渠字以受萬安人由明經任國子助教始從鄒守

益羅洪先受學奮勵刻苦至忘寢食

人物志

趙弼尹轍俱吉水人羅洪先稱爲文江兩生弼爲邑諸

生靜穆寡營因誦傳習錄有感毅然思自樹立轍嘉靖

鄉舉聰穎不及弼其質直寬慈而善忍過之兩生旣師

事洪先求證所得互指瑕疵請事無間寒暑

人物志

尹一仁字任之安福人嘉靖鄉舉官虞衡主事歷都水
郎忤中貴出守歸德多惠政被誣劾罷歸里居立保甲
置義倉消習俗卒之前數日遺書其友劉陽曰某不敢
不死於君子之手陽趨往視相對履日而卒

人物志

郭汝霖字時望永豐人嘉靖進士官吏科給事上平倭
十事又上疏極論時務奉璽書封琉球王饋裹蹄金不
受命督修通州灣城議者謂非二十萬不可汝霖力裁
之費止三萬有奇工竣詔升俸二級以南太常卿乞歸

府志

周案字濟甫安福人嘉靖進士爲吏部孤特鯁介引疾
歸十五年清約如寒士起補廣東嵯使釐剔鹽政商民
兩便之鎮撫八閩會山寇熾甚案運籌禽勦口不言功

進兵部侍郎督漕淮水橫奔幾鬪徐城時議徙城以避之案按行周視力主開魁山渠水勢遂洩案嘗遊羅洪先門學務踐履義利介然作十戒書壁間自警

人物志

郭應奎字致祥泰和人嘉靖進士授禮科給事中以建言謫霍邱丞歷升工部郎中移守嘉興罷諸浮蠹不便民者引疾乞歸不待命遂解印綬去自是家食三十年七薦不起倡建萃和書院日夕講學其中

府志

歐陽塾字宗儒泰和人嘉靖進士官應天府尹議賑饑民疏上未報塾盡發公廩便宜借貸所活數千人平日慕羅欽順之爲人居置義田立家約捐渡關衢施藥埋骼鄉人德之卒贈右都御史

人物志
白志舊案塾
通志作塾
宗儒府志作

崇儒

蕭廩字可發萬安人祖乾元以御史劾劉瑾廷杖下獄終雲南副使廩嘉靖進士授行人隆慶三年擢御史出覈陝西四鎮兵食斥將吏隱占卒數萬人歸伍固原州海刺都之地密邇松山爲楚府牧地廩言楚府封武昌牧地在塞下與寇接王所收四五百金而奸宄窟穴弊甚大宜諭使獻之朝廷詔可巡按浙江請祀建文朝忠臣十二人從祀王守仁於文廟尋擢太僕少卿遷南京太僕卿改右僉都御史巡撫陝西進右副都御史移浙江遷南京工部右侍郎召改刑部進兵部左侍郎卒贈尙書廩初從歐陽德鄒守益遊制行醇謹故所至有立

明史

張綱字美中吉水人嘉靖進士備兵潁州襄陽所在興

屯田殲巨寇擢都御史巡撫河南按紅蓮妖獄釋其脅從視爰書每至夜分嘗曰生靈繫吾一念敢自佚乎尋

卒

府志

彭黯字道顯安福人嘉靖進士撫河南時河數徙故道爲灘田沒於王府黯盡括之官歲得數十萬頃之人以代虛稅會王聯獄起株連士大夫至數十人黯委曲奏貸多從末減轉兵部左侍郎應天巡撫會倭寇迫太倉黯兼程往蘇州城門晝閉卽下令盡開諸門以納奔潰復制機宜爲驅勦計先後禽斬至千餘級升南工部尙書月餘寇復至言者以先事咎黯激上怒罷爲民

吉州人

紀略

朱衷字崇晉泰和人嘉靖鄉舉揚州同知倭寇犯境衷

領兵出遇寇於沙河敗之翼日寇大至且薄城東裒帥步騎抵敵壘伏發兵潰死之事聞贈參議賜祠錄一子

人物志

李挺字一吾安福人師事劉陽倡學閭里邑令日事造請凡利害興除多取裁於挺授徒講習至老不倦

人物志

周子恭字欽之吉水人少從李中遊力行所聞砥礪名節由明經授永州通判楚大饑臺省遣糴萬金子恭執不可比再至移通郡在官之食以應分授其直纔六千金上不逆令下不病農人服其敏擢德安同知卒

人物志

周賢宣字仲含萬安人嘉靖進士授繕部主事權稅革弊商民稱利忤中貴出爲延平守擢海道副使會倭寇偏城賢宣帥師敗賊眾於漳浦升右布政會有修郤者

假拾遺劾罷之歸日與郡諸子講求師說諄諄以啟迪

爲己任

人物志

郭宏德萬安人嘉靖中以舉人知臨武縣初邑有浮糧千餘石積爲民害宏德條其利病聞於朝竟從輕減民

免於累升安甯知州

湖廣通志

胡堯時字子中泰和人嘉靖進士歷官貴州按察使嘗師事王守仁謂職在刑名宜先教化以躬行爲人士倡修陽明書院凡其著作在貴陽者悉刊行之

貴州通志

王時槐字子植安福人嘉靖進士授南京兵部主事歷禮部郎中福建僉事累官太僕少卿出爲陝西參政張居正柄國以京察罷歸萬厯中南贛巡撫張岳疏言六年京察祖制也若執政有所驅除非時一舉謂之閏察

時槐在閩察中羣情不服請召時槐且永停閩察報可久之起貴州參政旋擢南京鴻臚進太常皆不赴時槐師同縣劉文敏及仕徧質四方學者自謂終無所得年五十罷官反身實證始悟造化生生之機不隨念慮起滅學者欲識真幾當從慎獨入年八十四卒著有廣仁類編漳南藁友慶堂存藁續藁等書

明史
吉州
人文紀略

陳嘉謨字世顯廬陵人與王時槐同年舉進士俱師劉文敏爲給事中不附嚴嵩出之外歷湖廣參政乞休歸家居三十餘年專用力於學凡及其門者告之曰有塘南在可往師之塘南時槐別號也年八十三卒著有四書周易就正藁念初堂存藁續藁道德陰符經注疏朱

陸摘要

明史
王時槐
傳
白志

劉文紹安福人嘉靖舉人令永定操守清嚴廣學舍興

水利輕徭賦振饑助喪善政畢舉禽王滿賊服李占春

之倡亂山背者在任六年乞休歸攀留者至以泣

福建通志

蕭文清廬陵人嘉靖舉人授祁州守發倉振災全活甚

眾築隄種柳號爲木城歲大旱文清步禱雲數密數爲

風散文清夢有鬼持幡招風醒觀祠中土偶如夢中鬼

因手碎之毀其祠雨乃降

直隸通志

龍遂字良卿永新人嘉靖進士爲給事中忤嚴嵩謫三

十年稍遷貴州僉事飭兵思南思南人聞其名皆畏之

遂至以德化民生致苗首吳黑於理事聞賜金帛

貴州通志

鍾紐字千鈞永豐人嘉靖鄉舉歷涇信宜天台三縣令

十年不得調沖澹自如卒官貧不能治喪太守爲棺衾

殮之邑人士以詩哭之曰孝追乃祖應同傳廉到無錢

可買棺紐蓋恭愍同之孫也

人物志

朱黼吉水人舉人任南京監察御史有激揚風力知南甯府政不瑣屑務持大體興學右文振作士氣屬邑有弊政悉釐革之民戴之久不忘

廣西通志

胡永成字思貞安福人嘉靖進士知涇縣振荒得法擢刑部主事歷知南雄府恤虛賦折輕齎減力役罷斥曠職之令僚屬肅然橋關權稅清介嚴明豪猾不敢正目視時詔召民鬻受僧田所司督促永成曰民故貧乃強責其受僧田非情也郡人欲析嶺路雄民不便永成條六議難之事得寢晉廣東副使卒於官

廣東通志

莫揚字子充吉安人嘉靖進士知江夏丈田釐剔姦弊

賦役悉平又力行條編法民永賴之

湖廣通志

顏鑰字子啟永新人以鄉薦授山東茌平教諭士鮮問學鑰誘以治心理性之方遠近翕從擢新城知縣改枝

江後歸與弟鑄日以講學善俗相勵

府志

顏鐸鑰之弟少從鑰聞王守仁立志說豁然頓悟躬行實踐爲族黨講說孝弟使人人感發會講豫章同仁祠暢發學庸大旨盱江羅汝芳尤嚴事之著有顏山農集耕樵問答等書

人物志

劉慤字致卿萬安人端毅公王之仲子嘉靖進士授工部主事晉郎中時仇鸞怙寵請別勅兵仗庫又請武臣得造弓矢給直慤連疏奏格之出守嘉興倭寇薄郡境慤峙餉繕兵濬葺城池造船制械郡藉以安歷升雲南

按察使巡撫湖廣革元祐宮莊田奪其租備歲築漢隄之費歲大饑募夫浚竹筒等河七處水洩而地可耕役夫因仰食於官所全活數萬人尋以大理寺卿擢南京工部侍郎卒

府志

王士翹字民瞻安福人嘉靖進士爲御史出視居庸三關嚴斥堠申條約增築城堡按廣西諸徭畏威咸斂迹不敢侵境內又著慎刑錄示所屬俾司刑者準式厯升總河僉都御史值河決民舍漂沒幾盡乃罷無名之供以拯飢溺

府志

朱衡字士南萬安人嘉靖進士厯知尤溪婺源有治聲遷刑部主事厯郎中出爲福建提學副使累官山東布政使進右副都御史巡撫其地召爲工部右侍郎進南

京刑部尙書其秋河決沛縣飛雲橋東注昭陽湖運道淤塞百餘里改衡工部尙書總理河漕衡馳至決口舊渠已成陸而故都御史盛應期所開新河自南陽以南東至夏邨又東南至留城故隄尙在其地高河決至昭陽湖止不能復東可以通運乃定議開新河築隄呂孟湖以防潰決河道都御史潘季馴以爲濬舊渠便議與衡不合衡持益堅引鮎魚薛沙諸水入新渠築馬家橋隄以遏飛雲橋決口身自督工新河成長一百九十四里漕艘由境出入通行至南陽未幾季馴以憂去詔衡兼理其事隆慶元年加太子少保山水驟溢決新河壞漕艘數百衡乃開支河四洩其水入赤山湖明年秋召還部四年秋河決睢甯起季馴總理給事中維遵言廷

臣可使無出衡右者六年正月詔兼左副都御史經理河道穆宗崩以山陵工召衡會邳州工亦竣遂還朝衡先後在部禁止工作裁抑浮費所節省甚眾神宗卽位不爲張居正所喜再疏乞休詔加太子太保馳驛歸卒年七十有三

明史

尹臺字崇基永新人嘉靖進士授編修分校禮闈策問及重臣權臣上覽之亟取臣鑒錄賢奸傳省覽嚴嵩心銜之復主試南直策陳祖宗馭將制兵甚備上摘策中事問嵩嵩方欲與臺結婚媾之好故善爲對乃令其子世蕃介私人置酒邀臺入席致勤懇臺竟辭之出爲南祭酒嵩舉酒曰先生行矣雖然將何以爲別臺從容請曰楊繼盛誠狂生竊願相公左右之勿貽盛世有殺諫

臣名歷南吏部侍郎當京察與嵩有郤者欲罷之有附
嵩者欲庇之臺力持正論善類卒賴以全未幾有讒之
於政府者削職爲民隆慶初起原官升南京禮部尙書
再疏乞歸建崇正書院割田以給來學讀書至老不倦
云

分省人
物考

曾翀字習之泰和人嘉靖進士初官刑曹擢御史出綜
鹺政清運河有功時大臣專柄言路扼塞翀疏罷尙書
劉龍鼐賢侍郎陳璋甘爲霖大理卿王綖都御史趙載
直聲震朝廷已而太宰汪鋐不職翀方臥病邸中憤然
具疏劾奏疏上褫鋐職而下翀錦衣獄與給事中薛宗
鑑同杖午門中使傳呼杖加厲翀神色不變但曰臣言
得行臣罪當誅杖已越日而薨隆慶元年贈太常少卿

蔭子入監

分省人
物考

劉邦采字君亮安福人與從兄文敏及弟姪九人謁王守仁於里第師事焉丁父憂蔬水廬墓免喪不復應舉提學副使趙淵檄赴試御史儲良才許以常服入闕不解衣檢察乃就試得中式久之除壽甯教諭擢嘉興府同知棄官歸邦采識高明用力果銳守仁倡良知爲學的久益敝有以揣摩爲妙悟縱恣爲自然者邦采每極言排斥焉

明史何廷仁傳
亮號師泉學者稱師泉先生
白志舊案君

王釗字子懋一字柳川安福人學於王守仁嘗爲諸生棄之栖栖於山水寂寞之鄉求所謂身心性命人皆曰今之講學不空談者柳川也

明儒
學案

楊載鳴字虛卿泰和人嘉靖進士授潮州推官累升至

通政使亮節峻履不愧文貞後裔所著有大拙堂彙惠

州志困喻錄

分省人物考

曾于乾泰和人爲諸生有名四方爭迎爲弟子師路出
贛州會闕以譏私鹽久閉羅亦隨阻吉人仰食於贛于
乾抗書謁督府督府讀其書萬言至屈禮延納開闢通
羅諸鹽賈循故事敘厚資納謝于乾弗顧司理王華向
爲同學友下車驩然道故于乾終華官無私謁羅洪先
招處石蓮洞六年于乾曰予從事畢志斯學卽終身可
矣

人物志

曾于拱字思極泰和人嘉靖進士授工部主事晉郎中
歷副使參政左右布政使擢副都御史總督糧儲致仕
其在閩藩也當倭訌諸道兵雲集于拱蒿日焦思百計

取盈士各宿飽嘗言平賦均徭莫善條鞭弭盜安民莫

善保甲所至必舉行之有文集若干卷

分省人物考

張秩字以敬安福人嘉靖進士早遊羅洪先之門日駸

駸於學問嘗曰吾身雖在樊籠吾心未嘗一日不在雷

巖洞壑中也登進士第改庶吉士以檢討充經筵展書

官預修世廟實錄

人物志

胡信方廬陵人嘉靖鄉舉官石阡知府會峒蠻悉眾薄

城下信方率民兵固守城陷死之

人物志

楊海字汝容泰和人士奇四世孫嘉靖進士觀政刑曹

日讀律不厭應大司寇試同官多倩吏海必親制曰此

職業也平居究心聖學發明紫陽窮理格物之旨甚為

當時所重

人物志 白志舊案 登科錄 楊海龍泉人

張啟元字應貞龍泉人嘉靖鄉舉知山東滕縣甚有惠政擢南京御史隆慶萬厯兩朝先後章疏數十上皆人所不敢言者請罷湖口新廠一疏尤爲世傳誦出備兵漳南拂衣歸所著有務本錄及奏疏若干卷

焦弱侯集

周以魯安福人嘉靖鄉舉少負奇氣不上春官日從事於性理之學精思力踐久之悟曰盈宇宙皆性也盡性外無學矣授司務出僉貴州臬戶庭蕭寂飄然有孤雲野鶴之致所著有貽庭錄

人物志

王宗尹字商甫泰和人嘉靖鄉舉通判杭州攝篆錢塘歲凶貸粟發賑或勸其引嫌宗尹曰吾爲民救死安計毀譽已果有嫉之者調永州轉知荆門州遂棄官歸

人物志

胡文宗廬陵人嘉靖鄉舉通判廬州升泉州同知值歲旱徒跣禱雨躬行賑恤多所全活每鞠訟推至誠以溫語諭釋之不干貴勢給由歸遂不復出

人物志

劉靜萬安人諸生嘉靖閒流賊陷其縣負母出奔遇賊將殺其母靜以身翼蔽求代死賊怒攢刃殺之猶抱母不解屍閱七日不變萬厯元年旌表

明史容師僊傳

傅應禎字公善安福人隆慶進士除零陵知縣調知溧水萬厯元年徵授御史張居正當國應禎其門生也有所感憤疏陳重君德蘇民困開言路三事言邇者雷震端門獸吻京師及四方地震疊告曾未聞發詔修省豈真以天變不足畏邪真定抽分中使本非舊典正統閒嘗暫行之先帝納李芳言已詔罷遣而陛下顧欲踵行

失德之事豈真以祖宗不足法邪給事中朱東光奏陳
保治初非折檻解衣者比乃竟留中不報豈真以人言
不足恤邪此三不足者王安石以之悞宋不可不深戒
也疏奏居正以疏中王安石語侵己大怒調旨切責下
詔獄窮治黨與應禎瀕死無所承乃謫戍定海十一月
用御史孫繼先言召復官陳邊備甚悉擢南京大理寺
丞將行奏薦海內知名士三十七人尋移疾歸三年而
卒贈本寺右少卿應禎與同邑劉臺同舉進士爲御史
同忤居正得禍鄉人並祠祀之

明史

劉臺字子畏安福人隆慶進士授刑部主事改御史巡
按遼東萬曆四年疏劾輔臣張居正曰臣聞言者皆
望陛下以堯舜而不聞責輔臣以皋夔何者陛下有納

諫之明而輔臣無容言之量也自高拱被逐擅威福者三四年矣畏居正者甚於畏陛下感居正者甚於感陛下洪範曰臣無有作福作威今者威福自己目無朝廷在朝臣工莫不憤歎而無敢爲陛下明言者積威之劫也臣舉進士居正爲總裁臣任部曹居正薦改御史臣受居正恩亦厚矣而今敢訟言攻之者君臣義重則私恩有不得而顧也願陛下抑損相權毋俾僨事悞國疏上居正怒甚廷辯求去伏地泣不肯起帝爲降御座手掖之慰留再三遂捕臺至京師下詔獄命廷杖百遠戍居正陽具疏救乃除名爲民戍廣西父震龍弟國俱坐罪臺至潯州未幾飲於戍主所歸而暴卒是日居正亦

卒

明史
白志

郭子章字相奎泰和人隆慶進士初爲建甯府推官入
爲南工部主事出爲湖州知府督學四川厯浙江參政
山西按察使晉湖廣右布政福建左布政予告歸時播
酋楊應龍叛糾苗擾蜀黔邊地亡甯日起子章巡撫貴
州兼制蜀楚賜上方劒嚴旨進剿益調各路兵專候大
舉子章歆血誓師聲罪致討人思自效庚子四月應龍
身帥各苗來決死戰子章會同劉綎親勒騎衝堅分兩
翼追奔破土月二城翌日遂破大城應龍闔室自焚生
獲酋子朝棟兆龍等百餘人露布以聞前後敘功有旨
議封爵大臣議非例始加太子少保兵部尙書蔭子世
襲錦衣衛歿賜祭葬子章天才卓越於書無所不讀著
述幾於汗牛燕聞晉粵蜀浙吳楚所厯皆有草有蠙衣

集等書行世

吉州人文紀略

彭應時字宜所廬陵人隆慶進士爲禮科給事直言不避權貴轉廣西僉事時思恩土司兄弟爭廕弄兵不奉節制巡撫欲加兵應時以妖寇穴鬪兵一發則亂必多殺無罪且山峒密深非歲月可平乃單騎入其巢溫言慰撫兄弟悔禍感泣遂釋兵聽命

人物志

曾乾亨字于健同亨弟從羅洪先學萬厯進士除合肥知縣調休甯擢御史劾尙書張學顏黜爲海州判官遷大名推官厯光祿少卿閱視大同邊務劾罷總兵以下十餘人屢奏備邊事宜輒中機要尋進大理少卿趙南星以考察被斥乾亨論救侵執政廷推巡撫者三俱不用遂引疾歸平生言行不苟與兄並以名德稱

明史曾同亨傳

賀沚字汝定廬陵人隆慶鄉舉授文昌令治邑有政聲
嘗師事王時槐專志理學時槐卒執三年喪遂以斯道
爲己任與同郡鄒元標講學青原西原之間士大夫多
遊其門著有敬止堂日劄圖卦億言道德經集注陰符
經釋義述古題箴聖學管窺諸書年八十三重宴鹿鳴
歿祀於祠

人物志

劉元卿字調父安福人舉隆慶四年鄉試明年會試對
策極陳時弊主者不敢錄張居正聞而大怒下所司申
飭且令人密謂之其人反以情告乃獲免既歸師同邑
劉陽絕意科名務以求道爲事既累被薦召爲國子博
士擢禮部主事疏請早朝勤政又請從祀鄒守益王艮
於文廟尋引疾歸肆力撰述有山居草還山續草諸儒

學案賢弈編思問編禮律類要大學新編諸書自吳與

弼後鄧元錫章潢與元卿並蒙薦辟號江右四君子

白志

原案元卿初受業於劉三吾復遊學於蘭谿徐魯源黃安耿天臺學者稱瀟瀟先生

鄒德涵字汝海隆慶進士從祀議起上疏極言王守仁

應祀授刑部主事歷員外郎張居正方禁講學德涵守

之自若出爲河南僉事御史承風旨劾之鐫秩而歸卒

年五十六

明史鄒守益傳明儒學案

王如堅字介石安福人萬厯進士授懷慶推官入爲刑

科給事中抗疏爭三王並封帝怒甚命與朱維京皆戍

極邊王錫爵疏救免戍爲民尋卒天啟中贈光祿少卿

明史

李廷諫字文源吉水人萬厯鄉舉厯官刑部郎中以子

邦華貴封兵部尙書篤行力學與顧憲成高攀龍劉宗周切劘性命之旨嘗戒其子邦華曰我亦人臣今老不能事君汝能致其身是代吾忠也

人物志

鄒元標字爾瞻一字南皋吉水人九歲通五經萬厯進士張居正奪情元標抗疏切諫懷之入長安門適廷杖吳中行等元標視杖畢取疏授中官給曰此乞假疏也及入居正大怒亦廷杖八十成都勻衛居正歿召拜吏科給事中上陳五事爲大臣所忌因災異封事降南京刑部照磨就遷兵部主事轉北吏部厯刑部郎中罷官家居建仁文書院聚徒講學光宗起爲大理卿升刑部右侍郎轉左都御史建首善書院與副都御史馮從吾講學羣小憚其嚴教科臣朱童蒙郭興治相繼攻之遂

再疏乞歸未幾卒逆奄追削爲民崇禎初贈太子太保吏部尙書諡忠介著有存真願學太平山房諸集

明史

儒學案

蕭基泰和人萬厯進士以諫垣論事忤逆璫出爲巡海道副使崇禎元年閩盜攻昌國石浦爵溪諸處基親督兵破之賊遂遁郡境無虞

浙江通志

王德新字應明安福人萬厯進士除南京兵部主事改刑部坐申救何起鳴斥爲民起補工部遷光祿丞所著有傲所先生集

安志

鄒德溥字汝光守益孫萬厯進士官至洗馬所解春秋士多宗之掩關宴居覃思名理於易道多所發明其京師邸寓爲奄人張誠家奴霍文炳故居以罪籍沒有埏

金在屋德溥家人發之不以聞官事覺罪坐主人革職
追贓門生爲之醵金以償著有易會學庸宗釋雪山草

匍匐吟

明儒
學案

鄒德泳字汝臣德溥從弟萬厯進士官御史給事中李
獻可請預建太子斥爲民德泳救之亦削籍家居三十
年言者交薦光宗立起尙寶少卿厯太常卿魏忠賢用
事乞休所著有湛源文集應求微旨平旦錄振玩錄復

古純書

明史鄒守益
傳白志

廖穀字式我萬安人萬厯舉人爲信宜令剛介廉潔清
鹽餉弊恤民之被豪強魚肉者升高州海防時寇李魁
奇窺限門禦之有方賊不敢逞權限門關稅所餘不入
私橐民立祠祀之

廣東
通志

朱維京字可大衡子萬厯進士授大理評事出判汝州
厯光祿寺丞三王並封旨下維京以爲非祖制上疏力
爭上大怒削籍爲民一時同官新建徐杰南海王學會
以救維京皆削籍初維京爲崇德知縣有惠政人爲立
祠水旱疾疫有禱必應所著詩文尙書于慎行爲之序

白志

劉應秋字士和吉水人萬厯閒進士及第授編修遷南
司業疏論首輔申時行并侵次輔王錫爵時主事蔡時
鼎南京御史章守誠亦疏論時行並留中應秋尋召爲
右中允充日講官厯右庶子祭酒二十六年有撰憂危
宏議者御史趙之翰以指大學士張位并及應秋所司
以應秋非位黨宜留帝命調外應秋辭疾歸數年卒崇

禎時贈禮部侍郎諡文節所著有大司成集

明史白志

蕭象烈字無競廬陵人萬厯進士厯官貴州按察使凡所讞鞫務期平允自奉甚約布衣蔬食有寒士所不能堪者推天下清官第一會黔人憤擊水西目把事連起大獄象烈力爲平反忤直指意被劾落職去

貴州通志

劉日升字扶生廬陵人萬厯進士知福州訟獄繁囂悉釐其罔洴厯京尹潔清自持師事王時槐學務實踐不事虛名卒贈工部侍郎賜祭葬所著有慎修堂集

人物志

羅大紘字公廓吉水人萬厯進士授行人遷禮科給事中甫拜命卽上定制書數千言復言視朝宜勤語皆切直先有詔以二十年春冊立東宮至是工部主事張有德以預備儀物請帝怒更緩冊立事尙書曾同亨請如

前詔忤旨切讓大紘復以爲言詔奪俸大學士許國王
家屏連署開臣名乞收新命納諸臣請帝益怒首輔申
時行方在告乃密揭言臣雖列名公疏實不與知帝喜
手詔褒答大紘乃抗疏謂時行陽附廷臣請立之議而
陰緩其事以爲自交宮掖之謀疏入貶邊方雜職俄以
六科鍾羽正等論救斥爲民大紘初受學於徐用檢旣
歸與鄒元標講學志行高卓鄉人以配先達羅倫羅洪
先號爲三羅天啟中贈光祿少卿著有紫源文集廬山
講義青原格言諸書學者稱匡湖先生

明史
白志

梁汝元字夫山永豐人少負異才聞王艮講學慨然以
道自任率同族建聚和堂立率教率養輔教輔養之人
各董其事延師禮賢以訓鄉族子弟計畝收租以贍公

家糧稅復捐千金創義田儲公廩以待冠婚喪祭鰥寡
孤獨之用數年間一方之人幾於三代後更姓字爲何
心隱游南北卒以負氣太高忤貴顯死人皆惜之汝元
嘗在京師客耿定向邸舍一日見張居正來汝元謂耿
曰分宜欲滅道學華亭欲興道學而皆不能能興滅者
此人也必操天下大柄後皆如其言

湖廣通志
縣志

曾皋字直卿廬陵人萬歷進士除工部主事晉員外郎
時乾清坤甯兩宮大工興皋董役精勤吏無所得蒙省
將作錢不下百萬運河議濬吉家口費不貲皋言今繇
役繁興物力告匱那借旣已無孔加派又重病民姑調
停於大挑小挑可無礙春運若大興工復故道請待來
秋從事更得報可出知潞安治行爲天下第一舉遽乞

歸起韶州建甯俱不赴庚戌起升長常兵道疏辭奉旨
升太僕寺少卿致仕加太僕卿家居三十餘年倡建書
院砥礪同志既歿門人私諡敬修先生年九十有五

吉州

人文
紀略

劉孔當字任之安福人萬厯進士以翰林院編修奉冊
荆藩謁假里門建識仁書院日研究良知之學居官十
四年故廬不蔽風雨

人物
志

朱世守字玉槎安福人萬厯進士厯官刑部侍郎引年
乞休馳驛回籍生平服官清慎雖居要樞而溫溫德隅
人無閒言

人物
志

周懋相字弼甫安福人萬厯進士鎮撫雲南地故叛服
不常懋相至撫定亂民糾鎮臣減貢金事竣改巡蘇松

業乘傳會羅婺鳳寇作亂吏報至毅然曰賊瞞吾行敢爲亂邪遂驅車返據曲靖牒各路兵復嵩明解河甸圍

六詔以甯

人物志

蕭近高字抑之廬陵人萬厯進士授中書舍人擢禮科給事中上疏言罷礦稅釋繫囚起廢棄三事尊俸一年頃之論江西稅使潘相擅刑宗人罪不報旣而停礦分稅之詔下相失利擅移駐景德鎮請專理窯務帝即可之近高復力爭遷刑科都給事中極陳言路不通耳目壅蔽之患又言王錫爵宜勿召朱廣不當更留皆不報故事六科都給事中內外遞轉人情輕外率規避近高自請外補乃用爲浙江右參政進按察使左布政使以清操聞泰昌元年召爲太僕卿廷議紅丸之案近高言

崔文昇李可灼當斬方從哲當勒還故里張差謀逆有據不可蔽以風癩歷工部左右侍郎天啟二年冬引疾去起南京兵部添注左侍郎力辭不允時魏忠賢勢張諸正人屏斥已盡近高不欲出遷延久之給事中薛國觀劾其玩命遂落職崇禎初乃復卒於家

明史

龍遇奇字紫海永甯人萬歷進士巡按陝西時秦中多冤獄繫於理者數十年不得釋遇奇閱故牘多所平反宥無辜數百人著三秦慎讞恤疑錄巡視兩陝以清謹

著聞

府志

彭惟成字元性廬陵人萬歷進士歷給事中力扶代王立嫡之議彈劾宰輔不畏權貴巡視京營勸訓練祛老弱疏言劉元卿理學儒宗應與諡不報升廷尉尋削奪

歸里崇禎初起太常寺卿著有諫垣存藁

人物志

劉朝璽字念南永新人萬厯進士初任廣州推官值羅定寇亂奉檄勦獲百餘人置之獄賊黨潛通獄吏約爲內應伺各官赴太平宴時發之朝璽方燕坐感白鼠過其前知爲兵象搜獄得所藏兵器遂斬諸賊夜半寇圍城將所斬首級擲城下寇知事泄遁去奏聞擢兵科給事中連疏劾首輔張居正怙寵擅權及其黨侍郎以下十七人直聲震海內遷福建僉事再升雲南副使適播變拔鄧子龍於夫役中任以統率竟平賊巢升貴州大參以疾乞歸歿祀邑鄉賢祠

吉州人文紀略

王振奇字石鯨安福人萬厯進士授工部主事同官萬燝以陵工觸魏璫立斃朝士無敢言者振奇獨抗疏白

其冤厯官右僉都御史巡撫甯夏以勞瘁卒官贈卹蔭

一子

府志

謝應祥字鳳皋安福人萬厯進士知嘉善有政聲解任日舟輕如葉命家人載石以行入爲銓司設舊於署一切書札盡投其中厯升山西巡撫魏璫煽虐以魏大中爲應祥門人遂嗾程九疇奏劾應祥引疾去

人物志

東新民字莊衢安福人萬厯進士由縣令行取禮部厯任浙江藩臬多治聲晉大理卿戶部侍郎升刑部尙書立朝丰裁稜厲不邇魏璫時推清介

謝志

劉鐸字我以安福人萬厯進士厯官揚州知府時逆璫魏忠賢大興黨錮羅織正人鐸題僧扇語涉譏刺璫見詩怒誣詛呪矯旨逮繫衛獄拷鞫備極楚毒臨刑抗言

不屈龍泉監生彭文炳吏目方景陽京東營弁曾雲龍
並以鐸事牽逮斬西市璫敗贈太僕少卿著有來復齋

集

吉州人文紀略 白志舊案科目考劉
鐸萬曆丙辰進士安福人舊作廬陵誤

賀康載字青園永新人與兄康衢萬曆壬子舉於鄉授
西安令時魏璫緹騎騷動閩浙過西安爲康載所挫斂
迹去舉卓異擬行取竟以忤璫量移兗州同知丁內艱

哀毀卒

人物志

劉淑唐字養冲安福人萬曆鄉舉赴試舟破溺水若有
人掖而出曰救祁陽賢令後果令祁陽清潔自勵在署
種蔬菜給朝夕不取於市課民農桑丈田糧虛耗無隱
居鄉倡學咸稱長者歿祀道東書院

府志

伍惟善安福人萬曆鄉舉知五河縣歲苦澇惟善繪圖

力請且自爲疏上之得賑濟免徵民賴全活者甚衆人志

康元穗字曰穎安福人萬厯進士令嘉善其俗不能葬者多棄棺郊外元穗至卽置漏澤園瘞之汰運糧浮額報最擬升吏部時魏璫恨元穗與魏大中善改南禮部主事里居建同善書院置義田次子范生鄉舉有文名

府志

曠鳴鸞字聲和廬陵人萬厯進士厯尙寶卿以忤逆璫削奪思宗兩詔起之詔中有通籍三十年立朝不數月之句再疏辭不允擢太僕卿升刑部侍郎命下卒於京

人物志

蕭命官字拙修廬陵人萬厯進士改庶吉士授編修厯

正詹推南京吏部侍郎以忤璫乞休疏入削奪歸籍居家杜門著書與人接無城府好獎拔士類崇禎朝起禮部右侍郎未任卒予葬祭

人物志

李日宣字晦伯

謝志作本晦

吉水人萬厯進士授中書舍人

擢御史遼陽破請帝召大僚面決庶政尋請開言路厚中宮忤旨切責出理河東鹽政還朝以族父邦華佐兵部引嫌歸逆黨倪文煥劾邦華日宣爲東林邪黨遂削籍崇禎初起故官巡按河南屢擢兵部侍郎鎮昌平協理戎政擢吏部尚書會推閣臣以蔣德璟等名上大僚不獲推者爲流言入內且創二十四氣之說帝惑之以徇情濫舉責日宣下刑部廷臣交章申救不納獄上日宣戍邊久之赦還卒

明史

謹案李晦伯集載其謫戍重慶國變後旦夕痛哭不食而卒

諡清惠與正史異府志亦云歸里病卒非戍所也

楊嘉祚字塞雲泰和人萬厯進士知揚州會白蓮妖寇號二十萬旦夕逼城嘉祚親履行伍堅壁厚陳以待之賊懼宵遁魏黨崔呈秀按江左索賂嘉祚拒之崔欲中以危法而臺臣交薦乃遷廣西副使備兵左江交南負固嘉祚馳檄責讓黎款關請服方論功呈秀憾未已竟奪職崇禎朝復原官力辭不起著有廣陵濬諸經論解

人物志

楊寅秋字義叔泰和人萬厯進士授東莞令擢御史奏免南海兵餉再疏罷冢宰王國光舉朝憚其風采出爲浙江僉事遷貴州參議時苗阿奇等劫掠屯堡寅秋誘阿奇斬之而撫其餘黨諸苗悉平升按察使再奉詔平

播州楊應龍有平播錄五卷以疾告休卒追贈太僕寺

卿府志

劉叔鼐字而強廬陵人性至孝生平銳意理學師事王

時槐所著有河洛圖書說顯密異同自證語錄

人物志

劉以森字轉華廬陵人萬厯舉人授定南教諭崇禎癸

未升國子助教再升工部司務未受任闖賊陷京被執

索賂大罵不屈賊怒加以酷刑肉糜踝折死

吉州人文紀略謹

案廬陵志載以森子從古明南京兵部主事嘗滿足走燕京覓父遺骸得衣帶血書歸葬遜迹不出居臨頓山

身終其

高應崗泰和人隨父仕燕任滿歸過濟甯父前行爲賊

所執應崗後馳至大呼曰老父薄宦囊無一錢賊舍其

父掠應崗囊亦無所有遂曳其父將殺之應崗以身蔽

父泣曰甯殺我甯殺我竟死於賊刃父獲免

安志 謝志 舊案高

應崗白志不載今補安志孝義尚有廬陵曠成乾劉文

衡王大年蕭瓚泰和王詔康漢梁材曾籛蕭興賢安

福張寅趙常姚周甫趙奎三李琳王之爵鄒志明龍泉

劉世臣梁穆李奇藝永新唐鼎賀孟連賀育瑞指揮僉

事王應鵬今附姓名於此

蕭廷對字觀我泰和人萬厯間以舉人授助教出守石

屏政尙寬平操守廉潔重農築堰置三社倉儲粟備荒

興學課士創立東南北三城樓後祀名宦

雲南通志

李之清廬陵人萬厯舉人任山西太原府同知會闖賊

圍太原攻三日城破之清被執大罵曰朝廷何負於汝

汝乃破州郡掠士女玉帛邪賊怒遂殺之

安志

李邦華字孟闇吉水人萬厯進士知涇縣行取御史時

朝士多詆顧憲成邦華與相拄遂指目為東林福王之

藩已有期忽傳旨將復更邦華首疏諫期得毋易巡按
浙江以年例出爲山東參議辭疾不赴天啟初起故官
飭易州兵備累擢僉都御史巡撫天津軍府新立邦華
竭力振飭津門軍遂爲諸鎮冠進兵部侍郎復還家省
父四年抵京奄黨劾削其官崇禎元年起工部侍郎改
兵部協理戎政加兵部尙書條陳九事軍鮮冒濫舊制
三大營外復設三備兵營每營三千人邦華請歸併三
大營不復另設歲省兵米二十二萬有奇上知其忠奏
無不從諸失利者銜刺骨怨謗紛然遂罷職閑住十二
年起南京兵部尙書以父憂去十五年起故官俄代劉
宗周爲左都御史都城被兵力疾上道抵九江左良玉
潰兵東下乃停舟草檄責以大義一軍遂安帝聞之大

喜陞見嘉勞十七年李自成陷山西邦華密疏請帝固守京師命太子監國南都又請定永二王分封太平甯國二府拱護兩京帝得疏意動繞殿行且讀且歎將行其言會召對廷臣中允李明睿疏言南遷便帝曰國君死社稷正也朕志決矣遂罷邦華策不議未幾賊逼京城三月十八日外城陷邦華走宿文信國祠明日內城亦陷乃三揖信國作絕命詞投繯殉福王贈太保吏部尙書諡忠文

國朝賜諡忠肅

明史

蕭士瑋字伯玉泰和人萬厯進士授行人謫河南知事厯南京考功郎中左良玉兵下留都士瑋抗言曰毋句卒毋登陴毋徙民居開九門以延之誰敢闌入者後拂

衣歸坐臥春浮園中著書樂道以壽終有文集目錄行

世

謝志 原案肅士瑋白
志作天啟進士今改正

黃紹杰萬安人天啟進士授中書舍人崇禎初考授兵
科給事中遷刑科七年五月因旱求言紹杰累疏乞罷
溫體仁帝怒調上林苑署丞遷行人司副八年賊犯皇
陵再劾體仁誤國召寇謫應天府檢校屢遷南吏部郎
中卒

明史

王禪字方塘安福人師事鄒守益議論侃侃不阿時修
郡志力爲辯駁所著有人物考

府志

王績燦字偉奏安福人天啟進士授興化知縣以治行
高等擢御史陳奸吏私派之弊又進賜環起廢容言三
說薦李邦華劉宗周等忤旨下獄坐贖徒與吳執御吳

彥芳同論譴云

明史吳執御傳

李長春字叔茂安福人天啟進士官御史首疏罷緝校錄遺賢減漕艘禁私謁感憤時相極言力詆下獄擬辟己就東市科道論救會大旱修省長春等五人得釋應日而雨海內有五君子之稱

人物志

劉士楨字須彌萬安人天啟進士官御史巡按貴州浙江墨吏望風改轍以忤時相出爲湖廣布政歸家杜門絕干謁好延接名士屢滿戶外士匱乏者悉請給焉

府志

伍承載安福人天啟進士由泉州學正厯升兵部員外每按籍清冊悉軍運之苦專疏條論謂漕非洒帶無以解焚艘之厄田非清丈無以甦虛荒之苦得旨次第行

之

府志

劉垂寶安福人天啟進士擢吏科給事中忤璫削奪崇

禎朝復職又疏糾權相降照磨時論偉之

人物志

周瑞豹字元淑吉水人天啟進士知甯鄉縣時璫燄方

熾南昌熊明遇徐良彥黃龍光皆謫戍過楚他令無敢

謁者瑞豹獨郊行館餽崇禎初調江陵擢兵科疏屢上

忌者追劾其令楚時催科數不足鐫級調用補光祿監

事時周延儒復相爲瑞豹鄉舉座主竟不往謁改行人

司副

白志

李士開邦華長子吉水廩生天啟中以救弟赴水死崇

禎初邦華疏列其孝友奉旨旌表子長世承祖蔭隱居

不仕閉門著述有南音名山藏詩文集

李忠肅奏議

郭維經字六修龍泉人天啟進士授行人遷南京御史

疏陳時弊極稱劉宗周之賢力詆吏部尙書王永光谿
刻置不問崇禎六年溫體仁代周延儒輔政維經言執
政不患無才有才而用之排正人不用之籌國事國事
日非止與二三小臣爭口舌角是非平章之地幾成聚
訟可謂有才邪帝切責之吏部侍郎張捷薦逆案呂純
如維經疏劾又劾掌中府撫甯侯朱國弼貪殘皆不納
以憂去福王立進應天府丞仍兼御史巡視中城尋遷
大理少卿僉都御史會國弼銜舊怨言維經署大理時
刑部以僞防禦使武愭案會題維經駁護袒逆乞重懲
聽勘回籍唐藩召爲吏部侍郎進吏兵二部尙書總理
軍務援贛州與楊廷麟萬元吉協守及城破入嵯峨寺
自焚死

國朝賜諡忠烈

明史

白志

勝

劉光震字肩吾永新人崇禎進士由刑部郎知兗州有廉威聲中貴過兗抗不屈改知雷州雷有湖漑田久淤捐貲鑿渠升雲南副使告終養歸著有翼雲堂遺藁

人志

劉同升字晉卿吉水人師同里鄒元標崇禎十年殿試第一授翰林修撰楊嗣昌奪情入閣言者俱獲罪同升復抗疏言之謫福建按察司知事移疾歸京師陷福藩立召起故官不赴乙酉五月南都不守江西郡縣多失同升乃入贛州偕楊廷麟籌兵食復吉安臨江唐藩加祭酒詹事兼兵部左侍郎同升已羸疾日與士大夫講忠孝大節聞者咸奮廷麟請以同升撫南贛十二月卒

於贛州

白志

梁希阜字康侯龍泉歲貢任廣東從化訓導勵名節善教擢知臨漳縣未赴聞京師陷懷宗殉社稷北面再拜

痛哭不食卒

忠節錄

王其竝字赤友安福人御史績燦子崇禎副貢力能挽兩石弓嫻韜略慷慨自負給事陳泰來薦軍前贊畫以守邊功議授推官旋遭闖賊之禍歸里與兄其定弟其隆其寘破產仗義從萬元吉守贛州城破殉節弟其隆同邑孝廉劉孟鞠劉應泗俱被難子謙言康熙壬子舉人歷官監察御史以直聲聞孟鞠應泗

國朝賜諡烈愍

縣志

謹案盼朝殉節諸臣錄劉孟鞠作孟鞠又作孟鞠劉應泗作應試又作應駟

俱中書舍人

徐士驤字公驤吉水人張獻忠寇吉州執至僞營欲官之士驤厲聲曰我天朝臣子肯同爾作賊邪不屈令穿耳肉袒遊市見一井忽投下賊縋出剗其鼻復斷一臂士驤罵不絕口賊怒甚乃剗心剗膚而死

國朝入祀忠義祠

吉州人文紀略勝朝殉節諸臣錄

趙雲字景龍永新人英勇好祕計以武弁莅贛獻賊入茶陵吉袁告警雲進籌曰吉安南控衡原北偏分宜吉有失袁不可守守袁不如守吉贛撫林一柱題之命移總吉營癸未十月賊至官民奔走已而入賊登城回視諸將無一人敢當者雲隻身挺刃大戰西城下身中數創氣猶不挫厲聲曰吾力竭矣生不能衛城死必爲厲鬼擊汝等言訖死

國朝人祀忠義祠

吉州人文紀略
勝朝殉節諸臣錄

龍之虬字伯子永新人崇禎貢士累官太僕寺少卿巡撫廣西駐柳州比至募兵徵餉無有應者得殘卒二千
人審視要害濬濠築壘爲戰守具城旣被圍之虬率士
卒冒矢石晝夜捍禦四閱月先是桂林梧州皆破外援
絕守將陳金舉開門爲內應城遂陷之虬被執不降死
方柳城之未陷也或勸之去之虬曰以死守城吾分也
引佩刀示志賦絕命詩藏衣帶閒詩曰背君失節敝體
辱親不忠不孝賊子亂臣我懷往昔信國忠勤危疆盡
瘁豈敢愛身斷頭剖腹庶幾古人至是果死於難妻朱
氏偕同官婦匿深谷聞變歎曰吾夫得死所矣奮身墜
崖而死柳人哀之收其夫婦遺骸葬於鵲耳山

國朝賜諡忠節

廣西通志 勝朝殉節諸臣錄

楊鍾字子辯吉水人進士崇禎閒巡按廣西柳州城陷

同巡撫龍之虬死之

國朝賜諡節愍

廣西通志 勝朝殉節諸臣錄

周國柱字汝梗安福諸生癸未冬獻賊寇安福國柱率族人部署壯勇禦賊身先赴鬪厲聲大叱賊爲辟易已見其從者僅二十餘人乃反鬪被三槍死吉安通判署安福事邵夢河坐堂上罵賊死同邑舉人王之儔入水死國柱與之儔

國朝並入祀忠義祠

白志 勝朝殉節諸臣錄

吳名標永豐人聞京師陷會族人作死別賊至舉族逃去名標手刃妻妾肅衣冠端坐中堂賊殺之顏色不變

國朝入祀忠義祠

白志 勝朝 殉節諸臣錄

龍嘉震泰和人崇禎壬午舉人授中書閣部楊廷麟監軍萬元吉守贛時辟參謀城陷廷麟等死嘉震亦自經殉焉初母王氏病劇嘉震刲股和羹飲母病尋愈贛撫林一柱表其門曰孝梅重馥

國朝賜諡節愍

忠孝錄 勝朝 殉節諸臣錄

彭文炳沂州籍吉水人官薊鎮遵化遊擊崇禎二年大兵臨遵化力戰不支陣亡母顏氏與妻韋氏俱殉弟文炯文彩及子遇颺遇颺俱同時陣亡

國朝賜諡節愍母妻弟子俱入祀忠義祠

勝朝殉節 諸臣錄

彭士宏錦州籍廬陵人崇禎十七年官南宮知縣城陷罵賊被殺

國朝賜諡節愍

勝朝殉節諸臣錄

伍經正安福人官衢州知府城破赴井死

國朝賜諡節愍

勝朝殉節諸臣錄

文師頤廬陵人官汝陽知縣崇禎十五年莅任甫三日與巡道王守琮等同守城比陷死之

國朝賜諡節愍

勝朝殉節諸臣錄

易士佳廬陵人主事

一作內閣中書

奉桂王命謀去孫可望事

洩被殺

國朝賜諡烈愍

勝朝殉節諸臣錄

王世定安福人官教授崇禎末賊犯攸縣世定率鄉兵

戰死

國朝入祀忠義祠

勝朝殉節諸臣錄

謹案勝朝殉節諸臣錄入祠士民尙有劉景瑗永豐人僑

寓浦城福建破緝於泮宮其時江西永豐有二一錄吉安一錄廣信舊志及兩府志均不載姑附於此

黃翊明字茂宏廬陵人崇禎九年鄉舉父君錫好學敦

行著蓄德錄以教子順治三年大兵既定吉安翊明

方奉父走武華山爲邏卒所獲問之不答令之跪不答

許以官爵不答將刃之翊明抱父泣曰兒不得終事大

人矣父子同見殺弟貞明聞變偕妻劉氏赴水死府志

案翊明舊志不載縣志誤書祔名府志有黃君錫傳列

之國朝今補正府縣志又載廬陵王肇崇禎五年從

兄璧勦粵賊戰死璧家在明世死王事者六人祔從明

太祖起兵父子皆戰死贈定遠侯孫業元孫莊及莊四

世孫應鵬應鶚皆以勦賊殉難贈卹有差舊志未及附錄於後

李陳玉字謙庵吉水人崇禎進士授嘉善令邑劇難治
前令多得罪去陳玉至逾年稱治清漕弊以便運軍建
鶴湖書院以教育士類擢禮部主事召對德政殿有儒

林循吏之稱除浙江道御史以憂歸著有進思堂集離

騷箋注卒祀鄉賢

浙江通志

顏士正字君信安福人崇禎中貢授萍鄉訓導見時事日非遂乞歸性孝友母病逾歲湯藥皆親手不假臧獲事父尤謹家故貧叔及從伯叔凡七人無傳者五士正奉之同爨十餘年年八十五卒子象龍自有傳白志

江西通志卷一百四十九

江西通志卷一百五十

列傳十七

吉安府六

國朝

謝九官字小相永甯人順治進士理刑松江民懷吏畏乞終養歸康熙丙辰丁巳閒楚寇勢熾弟九成不屈死

九官詣郡白其忠尋卒郡守私誅曰靖節先生

府志縣志

劉首拔字非羣廬陵人順治舉人官江南繁昌令爲十

歌以勸民務以德感縣舊納賦有扛費首拔革之尤愛

士教養臻至去官日各賦詩祖餞合刻爲棠陰集

府志

伍柳字菊偶安福人順治進士累官永昌太守吳逆叛

檄下郡縣柳僧服入寶臺山與將軍田進學密圖恢復

雲南平議復原職以母老乞終養歸坐臥灌園門無私

謁年六十四卒著有烏嘒樓詩勁草堂集子彥晉歲貢生性至孝父在滇南音問不通事祖母能得其歡迨父

歸尤善養孫蘇讓產賑饑以孝義聞鄉里

府志縣志

張貞生字幹臣廬陵人父其完善事父母數世同居兄病嘗藥侍膳維謹貞生順治進士授編修累官國子司業課諸生嚴正遷侍講學士以言事謫歸家居構我師祠以居宅爲誠意書院再起原官卒子世坤傳其學鄉

里稱孝

安志

鄒宏字能宏廬陵人順治進士江南上海知縣縣賦役繁重胥吏狡黠宏爲禁火耗嚴加派除差徭清刑獄邑

遂大治罷官卒

府志

顏象龍字三惕士正子順治進士初授寶慶府推官治

獄多平反改補景陵知縣時積歲凶侵民多逋賦上官督催飛檄如織象龍嘆曰吾何忍以子遺之民恣敲扑乎遂乞罷歸

府志

劉業廣字爾勤安福人順治進士少失恃事繼母極孝家貧出授徒每月析修金爲三十封寄其婦使每日持其一以市甘旨丁亥父喪適兵至其鄉見業廣衰經抱木主而行曰是孝子也乃得免

白志

張瑛字石耳安福人順治進士荔浦知縣時苗人梗化議用兵瑛作書諭苗來歸毋作不靖又爲民請蠲舊時課稅巡撫疏薦以病歸卒祀名宦鄉賢

府志

劉作樑字木生永新人順治進士官廣東歸善知縣邑爲東坡謫居地政事之暇閒爲詩文寄意山水人比之

海外文字尋改官浙江新昌政簡刑清訟獄囊息稱神明宰卒於官歸善民祀之白鶴峯東坡故居之左新昌

民祀之學宮旁

府志
縣志

歐陽動生字兼山安福人順治進士平樂推官改官寶坻知縣以清慎聞邑有奸民爲暴鄉黨能持吏短長動生廉得主名立置於法民以獲安擢武昌同知值逆藩吳三桂犯境寇盜四起流民苦饑動生倡義輸米以賑

卒祀鄉賢

府志

施男字偉長吉水人跡弛不羈爲詩文縱橫排盪屈其曹偶順治初從軍廣西以招撫敘功授按察副使

府志

曾振坤永豐人居近甯都山嶺崇峻順治初土寇大起振坤與同里姚仕城梁國柱練鄉兵守禦屢挫寇鋒又

勦賊於興國勝之康熙甲寅再擊賊於養軍山會滇逆
僞將結土寇流掠郡縣簡親王駐江西辦賊檄振坤爲
嚮導振坤率眾守竹篙嶺屢有禽斬予之官不就

府志
縣志

王自功字魏菴龍泉人高涼都司僉書從征李定國得
功擢浙江紹興都司軍中有鐵山之號康熙甲寅降賊
陳昇叛於吉安自功在籍募兵隨甘將軍爲前鋒禦賊
賊敗走甘返旆援楚賊勢復熾自功力扼衝要遂引大
兵復贛州旣而滇逆韓大任陷吉安又以其兵從簡親
王所向有功再從巡撫董衛國勦賊廣信旋至奉新靖
安招撫流亡事定請解伍歸先是陳昇旣就撫授之荒
田俾率部曲開墾昇遂挾以作亂泊昇伏誅上官議仍

以開墾付降將自功懲前轍力請自任立狀限賦八百

石除他族徧處之患鄉里德之

府志

陳南箕安福人明崇禎副榜性奇僻甲申後入歐公山
山界江楚懸崖峭壁人迹罕至南箕與弟觀偕隱其中
者二十餘年南箕常不語有所欲則弟視其顧盼指畫
輒喻意閒有來訪者拱揖而已與之言不應或貽以書
札不省視卽焚之偶有題詠亦不存藁衣敝垢不澣濯
食淡卽糜粥不充腹怡如也方弱冠時卽與弟同營墓
域爲左右穴中通櫺翼死後時相見暇則攜書挈壺讀
且飲於穴中其曠達類如此

府志

陳觀字二止南箕弟明崇禎舉人甲申後棄妻子入歐
公山南箕歿觀痛甚殮殯畢仍獨處萬山中手一編不

輟人亦罕見其面邑令張召南心慕之凌晨徒走以一役自隨入門聞其無人隨有一奚童出曰家主昨日已上山召南曰我亦知爾主必不見我者但得一登堂足

矣

縣志

賴良鳴字吹萬廬陵人

一作萬安

明諸生國亡不履城市專

意著述湖西道施閏章知府郭景昌司理陸時雍並致

推敬

府志

賀貽孫字子翼永新人工詩古文著述繁夥明季已抗

志入山入

國朝督學使樊纘前再召之不應巡按笄重光以布衣薦徵書至門愀然曰吾逃世而不逃名宜有是累乃變姓名與高僧羽客遊不知所終

府志

王茂字文素安福人性至孝父中和客死葬滇西茂方五歲號泣墓側暮夜不忍去恆謀遷柩歸葬忽夢中和曰我愛此山兒獨歸耳茂哀慟回籍父故遺田數十畝悉推以予伯叔曰爲子不能歸父喪忍受父產乎屢舉鄉飲大賓

府志

康范生字小范元穗子明崇禎鄉舉下筆千言立就海內知名慷慨重然諾遇通邑大利弊侃侃議論嘗赴公車途次逢南昌萬時華旅死爲經紀其喪性孝友撫教諸弟每以先世忠厚相勸勉季弟若生順治鄉舉

白志

張維垣字紫伯永豐人歲貢生修行於家蒸蒸然孝友嘗遊宣城施閏章之門子元鑑副榜貢生元銳康熙進士克世其學不墜家法父子俱祀鄉賢

府志

王裴字旦衣安福人親歿廬墓兄有疾灼艾分痛其論學以薛文清胡敬齋爲宗嘗爲施閏章言吾儒靜字主無欲禪學靜字主無事閏章甚韙其言

府志
縣志

項思宏字儀甫龍泉人歲貢生幼從其祖容檢講學於白鹿洞覽學案羣言歸宗易學嘗謂四聖十翼之書終始於懼由博反約道在是矣邑名宿多出其門晚號秉燭老人

府志

歐陽宗衡字層閩萬安人博通羣籍殫力於河洛星緯之學年旣髦著述不怠守道施閩章定其集爲六十卷

藏於家

府志

趙廷樑字上材吉水人歲貢生幼爲舅氏李陳玉所賞廷樑旣長陳玉流離楚粵聞廷樑實左右之凡五年始

歸旋從守道施閨章講學於青原族有孀婦無子見迫於宿逋廷樑罄所積爲之代償及孀卒族人以遺產來歸不受納於宗祠嘗著家範十則以教子弟

府志

葉擎霄字蒼平永新人工詩古文晚以歲貢生官贛州訓導性孤峭落落寡合同曹以爲畏友

府志

胡光溥字博先永新人諸生深研易理嘗與李謙庵劉木生究心性之學著原道太極諸論

府志

陳宗祿字在中永新人博極羣書尤邃於易明末操著得漸之上九遂一意隱遯以栽成後學爲己任學者稱

文節先生

府志

王萬禎

一作驥

字季齡廬陵人高尚不仕賦詩著書垂範

後起同里金德嘉銘其墓舉管甯陳實以爲況

府志

張之宿萬安人性至孝年十三通諸經曉大義順治初奉母避亂遇兵執其母宿請代母死引頸受刃感其誠

孝兩釋之

府志

劉彬字萬安人少孤山賊猝發劫其母彬字泣護之賊斫其臂不爲動中途母投水彬字從焉賊反救之並釋

歸

府志

蕭欽敦泰和人父罹冤獄欽敦請代對簿備嘗艱苦卒得白母病刲股以進隨兄山行遇虎啞其兄奮力與鬪

虎遁去

府志

李恆壽吉水人九歲時遇寇舉家被執兄恆秋先代母死恆壽豎髮噴目罵不絕亦引頸就死仲兄恆寅遂負母以逃去後爲諸生以孝謹聞

府志

劉秀雲吉水人八歲父母俱亡葬之日流賊突至兄弟三人共守棺哭賊殺其兄弟劫秀雲去凡十餘年始脫歸訪父母葬所聚土爲廬耕荒度日獨居三年府志

謝瑞徵字公瓊龍泉人善事繼母父卒廬墓三載時有

虎守墓側人以爲孝感祀忠義孝弟祠府志

縣志

劉必達吉水人幼有才略嘗練鄉兵禦山賊荒歲爲粥以食餓者府志

志

上官肅上官止吉水人父龍官浙江開化知縣家居

大兵臨吉安里人以龍效順執之就戮二子請代死不

許龍叱二子使去二子曰父戮矣子焉忍獨生皆死順

治四年巡撫董成學旌其門曰一門忠烈府志

志

李元鼎字梅公吉水人明天啟進士授行人遷吏部稽

勳主事調文選洊升光祿少卿甲申京師陷族叔邦華
殉難死元鼎守柩旁不忍去賊偪之不降順治二年授
太僕卿遷太常凡郊廟祭祀諸大典元鼎裁定者居多
歷官兵部左侍郎旣而優游林下以詩文自娛十餘年
卒著有石園集灌硯齋文集以子振裕貴贈戶部尚書

人物志

劉徵廉字季頑泰和人明崇禎鄉舉入

國朝官獻縣知縣愛民育士卓然有聲擢兵馬司指揮遷
光祿寺署正兄徵孝字孝若弱冠能文臨川陳際泰甚
稱之訥

朱之瑤字石者安福人以父世守廕授工部主事出權
荊州蕪湖兩關累官河南開封府勤於職事民有去思

擢奇嵐兵備道進山西參政廕一子擢湖廣石布政勞疾卒官

賜祭葬子經拔貢生光澤知縣改官永安以行能擢常州同知

統蔭生內閣中書舍人終戶部主事工書能詩詞

府志

李振裕字維饒元鼎子康熙進士改庶吉士歷官工刑戶禮四部尚書振裕生世家好學篤行自入史館至宗伯常以儒術備顧問與陳廷敬張玉書韓爌等同見褒嘉督學江南訓諸生一本關洛之學選拔貢士皆知名疏請釐正學宮從祀位次戊子大比滇省以人才日盛請廣額特破例題奏著爲令官工部時督建

太和殿工成費省任西曹明允庶獄

聖祖御書咸中有慶樹滋堂扁額以賜己巳歲察賑畿輔災荒

西連井陘北接醫閭全活甚眾先是江西苦腳耗督撫
屢疏請免格部議不行振裕爲昌言於朝乃得蠲豁至
今全省賴之以原官致仕卒年六十八有白石山房集
行世子景遂舉人保定府同知景迪進士官御史景迪
副榜景迴舉人官評事長孫暄舉人

白志

彭殿元字上虎廬陵人康熙進士改庶吉士授編修充
明史分校官癸酉順天副主考得南卷姜宸英顧圖河
汪繹等次第皆登鼎甲旣歸構薌谷小隱潛心理學讀
書教子依然布素卒年五十八著有薌谷藁若干卷
梁子興字仲起龍泉人性孝居喪不御酒肉至老哀慕
弗輟有從兄嫂無子老且瞶流寇充斥子興力保全之
旣亡爲經紀其喪所居城南待以舉火者百餘家

歐陽齊撰

傳

康綏猷安福人幼失怙恃長以不及事親爲慟每逢忌日輒哀慕至老不衰讀書淹貫經史晚潛心性理學者稱亦庵先生以子五瑞貴贈如其官祀鄉賢

志白

朱申仍字雲孫萬安人以孝友著嘗爲獻賊所執偪受僞劄不屈乘閒逸入山穴中餓七日采草食之既歸人以爲危曰丈夫甯從逆苟免哉子錫鬯進士禮部主事父子俱祀鄉賢

崇祀錄

郭林字入回泰和人孤介絕俗有潔癖終身不娶士論謂元紫芝倪雲林之流避地贛之七里鎮製葛帷讀書其中冬不鑪夏不扇多識累朝舊事編纂甚夥歲丁卯淫雨爲災所居室爲水淹藏弄線紉一夕漂盪撫膺而

呼曰天祝予安福吳雲者以詩名少參施閏章重此二人目爲一狂一狷嘗葺白鷺書院課士延林爲主席雲亦久客贛學詩者多從之請益白志
蕭來鸞字青令吉安人康熙閒以拔貢歷知延平府與士民相接必以孝友仁愛爲訓額其堂曰體認天理每朔望躬率僚屬耆老宣述

聖諭十六事親爲解說士民環聽興起鼓舞又嘗上徵輪法清

餘通上官善之

福建通志

解祖謨吉水人父以隕梯折足得藥草可療會積雪無可覓祖謨沿巖號泣草忽衝雪出服之得無恙居父母喪各廬墓三年墓前拜石淚漬成斑雍正六年

詔旌其門

謝志

康嘉字復祥安福人貢生性至孝痛父早世忌日號慟墓前不止事母色養備至病輒籲天請代母年逾九十卒嘉哀毀致疾旋亦卒嘉兩叔俱早死遺幼子女撫之婚嫁教養不遺餘力嘗出貲修祖祠置祭產又建同善書院捐義倉穀築陂隄灌田萬頃鄉里至今賴之卒祀鄉賢

安成崇祀錄

賀大行字可大安福人以樂善好義聞於鄉稱蒲山長者嘗見有人宿樹枝怪而問乃行客至此足疲弗能前夜縛身樹間避不虞卽惻然築茅庵爲止息夏夜置蚊帳俾窮旅獲安寢有病者調藥糜粥而進之周人之急或反遭侮辱亦不爲較歲侵有將僞鏹易粟因誤以納賦令廉而詰之大行知作僞之名不忍舉也頃之易粟

者曰吾豈忍負長者立自首焉年逾八十邑令相繼肅

爲大賓固辭不受卒年九十四

劉吳龍撰傳

歐陽崑字次天安福人性至孝父自操年及百歲崑色養猶孺子母歿時崑奉柩葬母獅泉阡柩過山麓遇虎咆哮輿輓者悉遁崑抱母柩哭曰虎容吾葬母畢當死於汝口虎徐徐去先是崑母嘗病崑泣禱願以身代妻毛氏以舅高年需養請以身代姑崑母旋愈毛無病而

終

孝行錄

劉爲先字予覺廬陵人康熙鄉舉官安遠教諭以正學牘諸生築談經樓發明春秋要旨年六十七卒祀鄉賢子首揆字敘百康熙鄉舉除知棗陽縣縣中東安里有明楚王莊歲輸數倍額徵首揆請如今額以浮羨補其

數棗陽民爲之作德政歌旋改金谿教諭

府志
縣志

謝上舉字季直永甯人康熙進士授山東萊蕪知縣未

赴歸講學於青原玉笥閒以著述自任施閏章贈號曰

玉巖再授陝西安定知縣未之官卒

府志

王嘉祿字紹廉安福人康熙進士滕縣知縣滕有河工

爲民害者三曰夫役防河曰柳帚差曰驛遞嘉祿條請

剔除民享其利

府志

王愈擴字若先泰和人康熙進士以古文名彭士望見

之於富田推爲湖西一人嘗與甯都魏禧避兵雲陽禧

爲撰竹亭集序弟愈融字侶薪諸生從彭士望魏禧論

學愈擴客死愈融悲悼成疾卒子元坤諸生能守其家

學

府志

黃業字懋成廬陵人康熙鄉舉德化教諭擢南昌教授
學宗宋儒力求實踐與同邑張貞生鄒一泉相切劘及
居學職輒取近思錄太極圖說西銘諸書爲諸生講明
心性南昌宦家子緣大府求貢成均業持不可拂衣歸
侍郎鄒士璉嘗爲之傳

府志

王謙言字山介安福人康熙鄉舉四川綿竹知縣興利
除害策名於時累擢御史立朝正直不阿稱王鐵面

府志

縣志

曾之傳字惕若永新人康熙鄉舉官安溪知縣屯糧多
積弊之傳剔除殆盡政若畫一嘗出資建考亭書院大
學士李光地爲之記

府志

梁弓字檀子泰和人康熙進士由庶吉士改兵部主事

尚書杜臻奇其才薦爲富新倉監督尋乞歸杜門著述

子機字仙來爲古文宗法漢魏詩尤瑰麗康熙進士官

文水知縣雍正中大學士朱軾薦舉博學鴻詞

府志

解以敬字畏三永豐人康熙鄉舉山陽知縣治荒有實政全活無數督漕所部卒毆邑民以敬執而杖之漕使

怒面加詰責不爲屈以強項聞尋擢主事

府志

周尚中

一作忠

字翼行吉水人以拔貢授建昌府學訓導

廣昌諸生以修學毀民居涉訟應禡者五人尚中知其

冤力持之事得白後五人者三登賢書一入詞苑人以

爲美譚改金華府經歷嘗攝司獄出己貲爲圍牆晨夕

課胥徒洒埽歲時賑給之在官三年卒

府志
縣志

康五瑞字毓宣安福人通春秋學康熙進士知南陵縣

清介有治績遷吏部主事累官給事中嘗上疏請卹漕
運廣學額禁奸民尋以劾大吏紛更左遷刑曹復擢御
史終翰林侍讀學士典廣東廣西試子定述舉人滿城

令

府志
縣志

歐陽齊字東一廬陵人博聞強記專治禮經康熙進士
改翰林庶吉士乞假歸遂不復仕

府志

李景遂字欽侯吉水人康熙鄉舉官內閣中書出爲保
定清軍同知保定民五方雜處多剽劫景遂逮治嚴豪
猾屏息貧民以訟事牽連留郡中偶入府衙薙草見太
守過訴其冤乞得李同知一訊守愕然曰李君得民至
是邪時用兵西北軍檄交馳夏大雨巖石轟裂塞居庸

關口

朝廷發使至不得前景遂方奉檄過昌平上言拆長城數尺道可通於是邊檄不達者六日矣用景遂策得無誤
明年

軍駕幸趙北口景遂攝河務

上顧督臣曰是向年拆長城通邊報之同知邪

召賦詩進戶部郎中旋卒弟景迪字遵洪康熙進士累官御史巡南城有滿丕兄弟不得於繼母將以不孝服上刑景迪原情爲請減宥優人徐彩挾勢擅殺人景迪聞之昌言於朝於是趙申喬上疏力請捕治富民有斃其傭工誣塾師者獄已具景迪曰塾師於傭何尤甫至卽殺二傭非情也再訊乃得主人殺傭狀雪塾師冤畿民愛之以鐵面冰心相稱譽旋外轉監司未任卒

府志
縣志

羅繼洪字範園吉水人康熙鄉舉江南長洲知縣嚴馭

吏役無敢弄法以治獄有名

府志

陳學海字二登永豐人康熙進士山東恩縣知縣三年

而治成士民樂利擢刑部主事轉御史出使治河南獄

抗疏劾撫臣田文鏡戍西域尋改翰林檢討旋卒

府志

鍾維楷

一作楨

字方齋

一作富

永豐人康熙鄉舉初仕湖口

教諭擢浙江海甯知縣力除積蠹人懷其惠邑瀕海修

捍海塘數百丈民免水患尤裨益鹽利戶口日饒

府志縣志

志

李飛字載文廬陵人康熙舉人浙江新城知縣改福建
連城舊時田糧多耗飛爲核實以絕影射貧民鬻鹽爲
私販多不勝治飛請加稅竈戶民不擾而弊除調順昌

創昌文書院教士厚廩餼嚴課程以終養歸卒年八十

二府志

王大年字惕若廬陵人康熙進士官鄆城知縣擢知定
州州多徭逋大年察胥吏欺隱者追奪所匿民貧不能
償者自以官俸抵之累官順德知府

府志

管學宣字虎臣安福人康熙進士直隸慶雲知縣擢知
山西沁州有德政改知雲南劔川破猺賊於石屏敘功
授楚雄同知修金汁河升麗江知府麗江新闢地偏西
番民多犵狓學宣爲設塾勸學權知永北府事條議苗
疆改轄流土具有方略母老乞歸養起補常德知府武
沅龍三縣毗洞庭學宣諭所屬嚴治隄防修築如法已
而左遷石屏州石屏爲學宣舊破賊地民素德之至是

益易爲治乃興復龍泉書院開濬異龍海口除民間徵租大斗僻壤窮鄉咸頌之年七十告歸所在立去思碑

府志

周三汲字滄際永新人康熙進士與臨川李紱同見推於嘉定張日容旣成進士不樂仕進仍以著書自娛

府志

鄔懋功字浣叔萬安人康熙中隨征滇粵有功授曲靖知府值兵荒後四境凋殘懋功極意招撫改革偽政給

牛本糧種民以安堵在官三年歸

府志縣志

羅景泐泰和人諸生以軍功官順天豐潤知縣明季有

邊布征額冊未除景泐請按糧帶徵無田者免民累遂除某寺僧詭爲尼汚良家子被殺置胥井景泐以僧行

惡當誅置勿問卒祀名宦

府志

龍燦字斗墟吉水人父榜順治進士廣平推官以執法忤直使改官遵化知縣有德政燦四川廣元知縣廣元民不自輸課黠者總攬之恆溢額外燦至今民自封識納犢中一時稱便旋以憂歸起補雲南宜良邑西有泉東流匯於赤江明時築堰開水洞資灌溉又爲橋以利往來至是皆堙塞燦訪遺趾復之更疏一渠以導支流

治最擢兵部主事累遷郎中

府志
縣志

彭烜字儉庵泰和人歲貢生少有俊聲累試不得於有司窮愁著述削藁盈屋嘗教學南贛諸郡遊其門者多

聞人

府志

顏會易字守乾安福人歲貢生讀書歐公山悟六十四卦大象著易學要旨待人有誠意嘗揭十六字於壁曰

濟人之危成人之美揚人之善隱人之惡

府志縣志

蕭瓘字非礪泰和人諸生力學好古博通經史學者稱

爲蕭夫子

府志

鄧心純字未孩吉水人諸生文名藉甚郡邑著作多出

其手弟心濰舉人並以著述稱

府志

周德盛泰和人素知兵康熙甲寅山賊起德盛練鄉兵扼巖隘乙卯五月寇分道出邨里皆竄德盛率數十人

往禦之手刃二賊眾寡不敵遂遇害

府志

劉綺字匪浣吉水人康熙乙卯山寇起綺率鄉兵防禦水北已而賊勢益熾綺乃約廬陵泰和吉水諸民詣郡乞師繪圖陳賊可取狀官軍進剿遂殲其渠餘寇既逸尋復聚且執綺去備極捶楚綺作歌罵賊賊怒剔目抉

舌以死同邑劉醇夫者與綺同起賊黨既殺綺並同醇

夫於途殺之碎其屍

府志

孫式先永豐人崖石砦寇起倡鄉人築土城備禦寇至

執式先使引道掠邨落式先曰吾方欲結兵殺賊豈從

賊邪大罵不屈乘閒自縊死

府志

匡尚卿萬安人有膽略康熙乙卯山寇蠡起尚卿謂眾

曰勢急矣若閉戶不出坐就縛耳若挈妻子而逃賊尾

其後亦危道也不如禦之及賊至尚卿突入陣斬其渠

又殺十數人力竭死賊眾卻走一邨賴以安

府志案鳳陵縣

志有龍大猷王兆祥經歷羅恪巡檢蕭詩存王崇坤監生程仿禧萬星泰劉碧劉毓秀蕭秉鐸李逢昇均以義

士旌吉水縣志有陳定成陳曰秀職員邱天將諸生毛文魁子珮璜均祀忠義祠彭大塔陳仁濬周作陶監生

周垣先均已旌萬安縣志順治丙戌康熙甲寅殉亂者有王彪郭人舉蕭衡謝在明盧鼎瑞附識於此

周永珍字蘊山泰和人年十四喪母廬墓三年父病痿痺康熙閒山寇竊發火其廬永珍負父突烈燄寇執其父欲兵之永珍號泣請命賊舍其父以永珍行中途阻小溪方覓舟永珍奮躍而過賊追之弗及父子並免於

難

府志

姚舜情字一性泰和人康熙閒逆藩之變父被擄躬歷諸險得父於寇巢乞以身贖寇令其指數鄉族富者刺股血出終不答感而釋之父歿廬墓聞母病歸會水夜溢屋舍傾母不得出舜情入水負之漂流不自主適樹枝值其前攀援獲免母卒復廬墓三年縣令劉崇爲作傳子開芳隨舜情賈成都隣肆火開芳蒙溼絮救父手足皆焦爛及歸舟觸石裂挾片板抱父浮水漂里許遇

救得生就其地爲傭以養父及遭喪哀毀幾殞生

府志縣志

劉服在安福人三歲而孤事母至孝康熙閒流賊竊發奉母逃山中爲賊所執母自投崖下折左臂服在呼號願從死賊竟釋之

府志

康志忠字良佐龍泉人康熙甲寅山寇起志忠舉家走永新賊踵至縱火父儒芹出與賊鬪被縛去婢竊其弟匿山谷志忠負母持戈出已被數創會大雨如注賊卻退志忠扶母入山遇婢與弟俱無恙托母於婢挺身走賊所大呼父何在賊執之使與父同受役志忠乞釋父而已就死賊兩釋之乾隆三十二年奉

旌表祀孝弟祠

府志

彭德瀾字波僊龍泉人康熙閒寇發城破德瀾使蒼頭
掖父已負母出遇賊傾囊贖父母再遇賊遂盡褫其
衣踉蹌至贛旬於市以爲養十數年始歸母卒父遭風
痺德瀾辛苦構窰窰出入負父以行中夜必數起又十
數年父歿葬祭如禮哀感行路雍正三年奉

旌表

府志
縣志

喪化遠萬安人康熙甲寅負母避寇匿山谷中與弟相
失出覓弟得之歸而失其母化遠大慟託醫卜走四方
凡十年得母於郴州奉以歸

府志

黃伉生廬陵人邑諸生九歲母歿鄰家火伉生伏棺號
慟雨驟至火息康熙乙卯寇至繼母方病不能行伉生
侍側賊脅以刃不爲動乃釋之乾隆中奉

旨旌表子象珮貢生亦有孝行

府志

羅大振字磐峯廬陵人康熙閒吳三桂叛父被執罵賊

賊欲加刃大振請代賊兩釋之卒祀鄉賢

府志

蕭仁清泰和人弱冠喪父傭其身獲值以殮甲寅寇亂

與弟仁游輿母日行百里卒免於難母病割股和藥以

療母卒一慟而絕

府志

胡禮字祥生弟祁字小宋泰和人事寡母竝以孝聞甲

寅寇亂勒鄉兵隨鎮帥剿賊殪賊愛子賊憾甚乘歲暮

突至復仇母方病禮祁不敢戰負母走荒箐危巖閒以

免其後同服賈贛州母復病舍猝歸省日暮遇虎山中

徑過不爲害

府志

王道祉泰和人家素貧父遊學遠方道祉奉祖以居康

熙甲寅洪水陡發急登樓避水及夜半風起水湧乃負祖漂流半里許得樹獲免已而父卒道祖奔往扶櫬歸舟觸灘石遂號呼鄰舟乞救柩甫舉而道祖溺舟子拯之出竟得疾踰半月卒妻蕭氏亦以孝稱

府志
縣志

陳廉字介石泰和人嘗率鄉兵禦山賊且導官軍以計戮賊親屬賊突至執廉父以去百計求之不得夜宿野廟感異夢偵之果得其所乃身投賊巢持金贖父賊義

之遂釋歸

府志

劉隱山泰和人康熙甲寅母爲寇所掠隱山求以身代賊釋之父歿備力於族人以爲葬具

府志

蕭士芊字次萬泰和人父孔錫禦寇死士芊年八歲隨母胡出匿途與寇遇胡義不受辱甘一死士芊哭抱母

吉安府
引頸求代寇釋之母歿廬墓雍正七年奉

旨旌表

府志

張可宗泰和人時滇逆變峒寇乘閒爲亂可宗扶父出避寇猝至刃擊其手可宗抱父不釋曰吾甯死以全父賊釋之

府志

龍吉景字水怡永新人逆藩變起父弟並爲賊掠吉景襁負其子入賊壘求代賊憐而釋之將出復抽刃擊吉景父吉景趨蔽傷左手至骨折

府志

傅齊公廬陵人母病貧不能得藥刲股愈疾未幾復病剖脅割肝雜粥以食母母又愈

府志

李慶蕃字衍萬永新人父爲賊所掠慶蕃抱父頸而泣賊感釋之鬻薪以供饘粥流離患苦孝養無缺知縣黎

芝上其事奉

旨建坊

府志

蕭士諫泰和人康熙閒寇變與父俱被執士諫乞免其父自以身代寇揮刃斫其右臂不顧卒全其父以歸府志張繩孫吉水人生四歲而孤家徒四壁飯牛負薪以養母比長商於外不旬日心動而返母果憂思致疾一見病愈康熙十三年歲歉繩孫烹粥奉母而已茹野蔬十五年山寇發負母避巉巖中以免母卒廬墓三年其地故多虎行者相戒繩孫居之無恙

詔旌其門

府志
縣志

謝崇祐萬安人居於鄉兄服賈城中招之從師受書偶歸逾旬兄往召崇祐涉水溺死崇祐痛兄之死也亦自

溺以殉眾救之入夜自經死府志

盛國宜永新人父渡河溺國宜遽入水出父於險家居

五世同堂乾隆元年奉

旌表府志

匡運昌字邵公廬陵人諸生里中田數百畝以水患墮

塞賦額如故民困迫呼運昌陳言當道請豁除鄉人感

之府志

張振義字麟趾龍泉人雍正進士直隸南樂知縣嘗單

車歷鄉曲諮民疾苦再補甯晉值大水條舉荒政民獲

更生憂歸朱軾薦試博學鴻詞科擢知隴州復降江南

祁門知縣調蘄澤枯捐俸償民欠侍郎汪由敦序其事

府志
縣志

趙廷雲字龍霞安福人能文章以鄒守益學脈家範諸篇與生徒相切劘言動必依禮法雍正癸卯舉於鄉試禮部不第就聘江南同考敦品勵行督學孫嘉淦稱之

府志

賀世駿字拔倫安福人雍正鄉舉選官長樂知縣地故濱海斥鹵不宜田禾世駿至度地勢築壩濬南坡修斗門功成歲收倍昔邑中陳塘港爲七十二溪入海處歲久淤塞世駿使民畫地分濬閒十五里則置閘旱潦有備在官八年百廢具舉旋擢主事卒祀長樂名宦祠

府志
縣志

伍煒字龍光安福人雍正進士山東黃縣知縣痛革夙弊除花茶二稅以祖母老乞終養起補永定知縣權龍

巖州州民苦鹽值昂羣聚詬商強貨之商懼將閉市煒平其值計戶以給一州稱便歷官崇安古田諸縣擢吏

部主事

府志
縣志

解韜字幼圖吉水人雍正進士授刑部主事改知貴州安化縣以防苗功擢安順通判郡民有夜中流矢死者視其矢書讐家姓名前官捕治旣誣服韜至謂乘夜殺仇仍署姓名非情實懸賞捕真者抵於法遷知獨山州進銅仁同知左遷南河通判楊莊口水淺滯漕艘或議開臨黃臨運二壩引黃河水韜陳運河淤淺疏治甚易黃水方高一丈二尺有奇一開則勢若建瓴堤或潰決民將奈何江督據以入告事乃得寢遷揚州同知調海門改蘇州海防同知卒

府志
縣志

胡定字靜園泰和人以保昌籍成雍正進士是科

上諭九卿各舉所知定以侍郎錢祖鎮薦授翰林爲一統志纂修官主試廣西轉御史彈劾不避權貴嘗奏河南巡撫曲庇屬官誤劾糧道旋奉

命前往勘其曲直公論寔之擢兵科給事中巡視西城乞養歸

府志

胡樑字燕卜安福人雍正鄉舉幼孤事母盡孝爲詩古文詞嚴整有法度嘗講學豫章白鹿洞進退古人不少

假借府志

賀錦旒字冠御廬陵人拔貢生九歲能屬文比長勵志儒先之學身體力行朱軾嘗稱其所著書篤實切要府志王尚錫字大邨廬陵人歲貢生淹貫經史教學於鄉以

致知力行爲主李紱累稱之府志

王世業廬陵人歲貢生家貧束脩養親雍如也學術深

邃嘗被薦博學鴻詞不就家居端謹鄉里相引重府志

解友楠字讓木以敬子隨官京師肄業成均涂天相何

焯李紱並相推服稱江西名士性曠達不事生產破帽

敝裘怡然自得弟友梓友杞並能文友梓孝廉方正乾

隆鄉舉南城教諭府志

郭開圖吉水人佐父力耕嘗遇虎以身衛父奮力格鬪

傷右手父母歿並廬墓上墓近河干會秋雨山流驟長

決墳漂棺開圖操舟順流求之數日不得籲天泣訴尋

蹤至峽江遇之沙阜人以爲孝感乾隆六年奉

旌表府志

黃岡竹字昂五廬陵人乾隆進士直隸贊皇知縣以廉能著嘗設留養局濟窮民立勸戒八事爲歌謠俾易通曉在官十二年獄訟衰息既老告歸布衣蔬食樂善不

倦

府志
縣志

黃有恆字圖久廬陵人乾隆鄉舉以明通榜揀發山西歷權寄嵐靈晉諸州縣補官高平知縣捐建義學置田以安流犯無業者擢保德州知州所至以手書帖子榜於門曰徇請託枉是非由斯路乃汚斯路納苞苴通貨賄入此門不出此門見者竦然

府志

劉柬之字存吾廬陵人乾隆進士直隸西甯知縣決疑獄捕盜賊不嚴而治有古循吏風去官貧不能歸主講山西書院多士悅從曲沃志列寓賢傳年九十餘卒

府志

志
縣

羅暹春字旭莊吉水人乾隆進士翰林院編修典試廣東轉御史左遷刑部主事擢員外郎六治秋讞一議減等釋囚六千餘出守德安築隄賑饑禽斬京山賊渠嚴金龍調黃州累擢山東鹽運使攝按察使乞歸自稱水田灌叟

府志

趙爾璽字信昭吉水人乾隆鄉舉中明通榜授德安教諭擢直隸平鄉知縣時大水縣故土城將衝決爾璽築隄開港浚牛尾河達漳水民患乃紓改威縣調辦水營卒於工

府志

王星照字開翕安福人乾隆進士直隸魏縣知縣時田閒產土贏子或妄以爲蝗孽大府信之檄捕蝗星照察

非是抗不行歲竟大熟縣界河南河工派役滋重星照
畫界均役民多免者漳水經流無定忽徙而北爲築隄
捍水民樂趨事尋乞歸

府志
縣志

羅達春字煦皆乾隆鄉舉厯知青田新野夏邑縣事新
野民殺兄以誣其仇獄久不決達春反覆詰難察其弟
顏色有異一言折之獄遂定夏邑城南毛河久塞天雨
輒溢濬治之民享其利以積功擢信陽州知州

府志

李六龍字擎兩廬陵人乾隆鄉舉揀發廣西權武宣知
縣歲旱荒畸民覃文緒倡諸佃抗糧六龍懲文緒拊循
餘眾民無驚擾上官重其能擢權西隆州興學校敦教
化區畫鹽政具有條理徭人亦安改知平樂土瘠民健
訟六龍日與判決並施董勸不三月而化行卒於官

府志

縣志

歐陽桂芳字木齋泰和人乾隆鄉舉直隸威縣知縣廉直勁正杜絕請謁朔望集父老子弟教之孝弟力田稱循良吏以親老改官萍鄉教諭

府志

王吟字旦方安福人能文章浩瀚恣肆不可方物乾隆鄉舉試禮部不第卒京邸侍郎錢陳羣爲廬山桂詩以

哀之

府志

顏雲聳字錦雯蓮花廳人乾隆進士陝西甘泉知縣縣東鄉去城遠每遇放借倉糧民苦奔涉爲建新倉於臨鎮邑舊有樂戶削其籍民德之卒於官

府志
縣志

聶因培字能受永豐人乾隆鄉舉初官山東知縣賑水災有實政所活甚眾改官直隸歷權樂亭靈壽縣事聽

斷若神先是陸隴其宰靈壽以德治民至是民稱陸公

復見緣事左遷河南彰德府經歷乞病歸

府志
縣志

袁純德字松皋泰和人乾隆鄉舉陝西米脂知縣擢湖北宜昌通判宜昌濱大江舊立三卡稽查私販爲豪猾把持行旅嗟怨純德廉知主名痛懲之遂無敢逞移黃州岐亭同知擢貴州思南知府銅仁苗句楚苗作亂純德先事豫防苗不敢犯年八十乞歸

府志
縣志

歐陽柱字廷幹泰和人乾隆進士湖南江華知縣邑境西南與廣西富川接壤民爭地爲私鬪柱爲畫正經界爭乃絕創正心義學公暇爲諸生講授權永州理猺同知憂歸遂不出與龍殿鼎曾聞勇歐陽桂芳劉恆爲五老會賦詩倡和卒年八十二

府志

龍殿鼎字居之泰和人拔貢生貴溪教諭表章節義不遺餘力年老乞歸與歐陽柱諸人結五老會耆年淵德羣推祭酒弟賜鼎亦大年子孫環侍無有或怠鄉黨師其家範

府志
縣志

胡兆爵字珮三廬陵人幼受讀卽有志於顏子四勿孟子書中三自反乾隆閒成進士不樂仕進歸而設教郡城四方從遊者數百人建毓賢書院以講學晚號璞叟

府志

姚頤字震初泰和人乾隆丙戌第二人登第授編修典試貴州三充會試同考官累遷左中允倬直

上書房出爲湖南學政所至正文體杜干謁振拔孤寒親與講畫士皆敬服出知蒲州府累擢湖南按察使以母

憂歸起官仍入直

上書房時以爲異數與中貴忤出爲甘肅按察使旋卒

府志

志縣

解文燧字學序永豐人乾隆進士福建海澄知縣稱循良吏大學士蔡新爲文記之量移臺灣厯知順昌南靖

有政聲

府志縣志

李維掄

原名藩

字仲屏吉水人乾隆鄉舉山東泰安知縣

多惠政以憂歸起官廣東新安知縣縣境瀕海多盜維掄禽治七十餘人宵小屏迹會受檄充鄉試同考饑民在邑謀劫奪代者張其事以會匪結變上聞且乞兵維掄方出闔單騎至邑撫定之縛首惡數人境遂安

府志

劉珏字輝堂廬陵人乾隆進士刑部主事累遷郎中隨

侍郎熊枚察賑直隸水災全活甚眾擢山東沂州知府以憂歸時廣東博羅會匪起閣學那彥成進勦請以珏縑墨從戎事平轉雲南臨安府建水夷白奎奪其弟土司世爵縣令不能禁請以兵從珏持不可檄土司自縛首惡誅之民夷感德調雲南府遷迤南道晉廣東按察使乞歸卒祀鄉賢

府志

麻永年字松崖廬陵人廣西永康知州調知養利州故邊障無城垣永年至卽請建城以衛民報最擢順天治中累遷刑部郎中兼戶部倉督出爲山西甯武知府慈祥愷澤民稱生佛護理雁平道勘災五臺履險致疾告

歸卒

府志

劉世瑞永豐人歲貢生上高訓導性孝友以明倫崇道

爲己任爲文厚重樸質引掖後進不遺餘力學者稱文

孝先生

府志

劉榮登字景楊吉水人歲貢生精於地學嘗注方輿記
教學於一經樓守道固窮爲鄉里宗仰

府志

燕章誠字和亭萬安人選拔貢生歷官廣西向武奉議
州判奉議邊地民鮮務學章誠至創立義塾以訓士地
勢峻遇旱輒困章誠出江右水車式製以灌漑分給各
鄉民知利用擢河南寶豐知縣

府志

羅士昂字予懷廬陵人初官鹽大使改知縣權肥城事
民有以邪術誘人定罪者士昂察其誣平反之坐落職
未幾事白復官效力河工補鉅野調河南永城開洪巴
等渠七十二道除知許州時楊橋河決漫及陳亳士昂

經畫開濬民患方息擢山西朔平知府會榮澤民亂城
晝閉將興大獄士昂未赴晉檄主是讞釋連坐者數千
人兩攝歸綏雁平道以疾卒

府志
縣志

麻廷璫字鳴佩廬陵人貢生初官甯國知縣移合肥遭
荒歲賑卹拊循並有惠澤以讞獄奪職起知新樂承檄
勘定州荒田民獲免賦改吳橋會德州河決有胥齒憂
廷璫出境堵禦於吳橋築埝以制德州之衝水遂歸宣
惠河制府方觀承上聞擢石景山同知改權宿虹卒

府志

郭聖榮龍泉人浙江温州海防同知甌江東達海洋商
歲乘海舶交易百貨率爲牙人欺隱聖榮立法使以貨
直期限詳書於券主客互執各有據依商民和悅海濱
舊闕荒地多爲豪右兼併聖榮履畝丈量民得復業改

判興化卒溫州民肖像祀之

府志

謝于誠

一作城

永豐人諸生以詩古文鳴於時稱名在汪

軻楊屋蔣士銓余蛟謝本量諸人之閒

府志

譚尚書字述唐永新人歲貢生新淦訓導初知縣程尚
贊作乾隆王志正譌錄尚書感其事復博求文獻以訂
邑志之訛爲禾川書弟尚禮歲貢建昌訓導亦以文學

著稱

府志

蕭功健字慕姚廬陵人諸生幼嗜學潛心於易嘗謂易
本義前九圖與本義啟蒙不合又考朱子與門人論易
於九圖無一語定爲贗本又謂毛奇齡仲氏易多穿鑿
附會核其所撰推易始末易小帖亦每有抵牾其精確
類如此家居授學以立品爲先於義利之介辨別最嚴

子國琛拔貢生歷義甯南昌新城學官以博學高才著

聞於時粵賊至殉難

府志

解貞讓吉水人鄰里火延及其廬母不得出貞讓冒火

負之眉髮俱燬人稱燃眉孝子

府志

毛鳳江字礪山吉水人七歲父歿哀毀如成人比長事

母稱孝母歿廬墓三年歲大旱山中無水夢神予之泉

晨起果得人稱孝泉

縣志

李汝駒吉水人事父母盡孝父患疽入山采藥歸遇虎

乃執藥而泣虎爲搖尾去父母相繼歿居廬六年若將

終身族人哀其志迎之歸鬢髮盡白知縣彭淑旌其里

曰順德邨

府志

賀鳳池廬陵人父某拔貢生謁選京師卒旅舍鳳池扶

櫬歸舟次韓莊間遇暴風幾覆舍舟登陸道出徐州鄰舍火將及棺鳳池伏棺號呼搶頭流血市人爭感爲出其櫬旣歸葬廬墓三年母喪亦如之鳳池卒妻劉守節夫婦並奉

旌表

府志

曾孟良泰和人父渡江溺死水深流急求父屍不得孟良截一指投之江號泣呼父屍遂湧出

府志

劉應龍廬陵人嘗拾遺金三百坐待其人還之族有兄弟爭田出己資令釋憾其後人有爭者愧令應龍聞數十年中鄉里無訟

府志

張瓊英字鶴舫永豐人弱冠領鄉薦嘗客揚州時南城曾煥方爲兩淮都轉運使開題襟館延四方之士推瓊

英爲上客而瓊英泊如也江南王芑孫有文名睥睨一切然心折瓊英由是名譽大起嘉慶辛酉成進士官天長知縣甫四月謝病歸旋改官饒州府教授王鼎視學江右嘗稱瓊英氣象冲和言語簡重能體道有得子舒輩歲貢生舒翹舒翰進士皆能世其家弟瓊芝歲貢生亦以文行著

府志

解運衢字宜礪吉水人嘉慶進士改庶吉士散館授山東鄒平知縣地瘠多盜運衢治朞年盜賊斂迹嘗手定保甲巡查法上官臈之著爲令移章邱甫三月決獄二百餘事以勞卒

府志

阮烜輝字仲寅安福人父復祖舉人會昌訓導烜輝嘉慶鄉舉以大挑官山東歷十二州縣四充鄉試同考先

後四十餘年治不煩苛案無留獄方權萊陽邑大疫烜
輝禱之雩壇雷電陡作病者盡瘳任恩縣蝗災不入境
劫盜服畏戒無相犯同治丁卯重宴鹿鳴踰月卒兄燦
輝進士官編修弟炳輝舉人河南知縣皆有聲府志縣志
蕭錦字標甍泰和人嘉慶鄉舉晚授清江教諭振拔寒
峻士頌不衰府志

王贈芳字霞九廬陵人祖光昇父殿埤並有孝行贈芳
嘉慶進士改庶吉士散館授編修轉御史累疏濬海口
行海運議淮鹽積弊嚴緝會匪禁開銀礦皆當時要務
轉給事中出知山東曹州府曹爲盜藪贈芳力行保甲
盜以靖定陶賊李瀝林倡亂縣不能治請以兵捕贈芳
單騎走定陶諭以禍福賊環跪馬前稽顙乞命事遂定

量移濟南出積俸修閔子祠累官至雲南鹽法道卻饋遺累萬金前後三權按察使以留辦猛緬獄感足疾告歸贈芳官翰林時累充廣西福建湖北典試會試同考視學湖北漢陽有桃花夫人廟仕女雜還贈芳毀瘞像改建先儒陳良祠生平篤嗜經術著書等身卒祀鄉賢及湖北名宦祠子其灝殉難浙江

府志
縣志

彭履垣字平園泰和人嘉慶進士知四川南川縣事爲政務寬簡持大體在官十八年民德之

府志

郭儀霄字羽可永豐人嘉慶鄉舉內閣中書詩書畫有盛名大學士潘世恩王鼎皆敬禮之朝鮮使臣權敦仁

李石友嘗乞其所作傳之東國

府志

周作楫字夢巖泰和人嘉慶進士改庶吉士授編修預

修一統志道光字典典試廣西留視學政龍啟瑞曾克敏皆所得士旋督學河南歸轉御史出爲貴州銅仁知府銅仁人士向就試於定遠作楫憫其風雨跋涉旅斧多艱集資倡建銅仁試院士庶頌德厯權思南都勻興義諸府晚知遵義禽女賊號千手觀音者及巨寇李永發累官山東長蘆鹽運使

府志
縣志

陳重光字樵雲泰和人浙江嚴州府同知調雲南臨安府府境有河三溉田千頃水漲輒被淹重光爲築隄以絕水患修見龍橋築閣其上民以陳公橋陳公閣名之遷知甯州州故苗羌雜處案牘山積重光剖決無滯訟爲之清濱江沙涌成洲民請報升課重光不許或言於糧道將許之重光馳曰沙水相激漲溢靡常征額既定

後累何極乃止及明年果爲巨浸後乞歸家居垂三十年足迹不入城市卒年九十四

府志
縣志

陳佐字嗣龍泰和人拔貢生湖南龍陽知縣治行第一遷武岡知州鳳凰廳同知地故苗疆號難治佐善拊循民苗皆悅上官異其政請擢辰沅兵備道吏部議越次遷擢非故事

上知其名允之乞假暫歸道卒服官所至民多尸祝之

府志
縣志

陳丹鳳字威如萬安人拔貢生以教習官福建知縣權知甌甯事甌有嫠婦撫遺孤尚幼家饒於資族人以嘗就尼寺疑而訟之出千金賄令丹鳳怒拒之諭婦善自教子不當以誦經入寺致族人疑議甌人頌其廉惠解任後尋卒以貧故負官逋邑民集資爲償其半

府志
縣志

曾明秀吉安人賈於四川定遠縣有母年八十八臥病垂危嘉慶五年教匪猝至明秀守母不去遂遇害四川通志況元禮字竹香廬陵人國學生嘉慶閒陳時務五事曰足兵曰理財曰靖洋曰除弊曰善後

仁宗俞之賞銀緞

上西巡元禮獻詩列姓名二等再進河務策

命留覽元禮足迹徧天下凡所經歷風土人情靡不甄錄詩古

文辭皆可傳

府志縣志

徐湘潭字東松永豐人拔貢生幼穎敏讀書日數行下工古文辭王鼎嘗言吾於博學見江南包世臣於古文

見江西徐湘潭

府志

王光昇字藜輝廬陵人四歲喪母見母衣履輒號泣年

十三父卒事繼母至孝及卒哀毀不自已葬時有白鳥
三相悲鳴人以爲孝感子殿墀字衷佩諸生母病爲吮
創父病露禱請代泊遭喪廬墓哀哭有虎睨其側如馴
擾者桐杖生萌枿山麓忽涌水泉人呼孝子泉父子俱
奉

旌表翁方綱嘗爲之傳

府志

郭常瑞字嘉年廬陵人父官直隸常瑞奉母北行出清
江天妃聞水激將沒舟常瑞仰天號泣忽大風牽舟傍
岸旣至竭螯其母成癰常瑞吮之而愈後父母相繼卒
奉櫬歸廬墓三載以孝行奉

旌表尋舉孝廉方正

府志
縣志

彭葵安福人鄰室火葵父赴救火烈不得出葵入火負

父走免頭額俱灼時人謂之焦頭孝子所居近南賦邨有魚塘在江口夏水暴漲塘岸阻遏全邨欲沒蔡曰人命至重吾忍以魚故害人哉卽日掘塘岸引水入江人

呼爲救生塘

府志縣志

李憲昌字清遠吉水人有莊歲儲穀六百餘斛春初出其一助窮農臘杪又出其一給族里度歲人呼爲救貧

莊

府志縣志

李先蕃字用錫吉水人諸生邑同江水次漕倉創自前明羅念菴後燬於兵歲在江岸輸納先蕃倡復舊倉鄉人以爲便又於臨江建三橋白是無溺水者

府志縣志

李銑字對廷吉水人監生邑有地曰單陂年久而傾旱澇皆患銑出已資復之陂上甃石爲橋以利行道歲侵

市穀鄰郡以賑嘗夜宿風雨暴至牆忽圯去榻僅尺咫

銑竟無恙人以爲陰德所致

府志縣志

徐泳川字溥泉永豐人附貢生樂善好施嘗設義倉贍

窮乏道光中奉

旌表

縣志

阮文藻字侯亭安福人道光進士歷官安徽湖南貴州
諸州縣初權太和獲劇盜數十爲巡撫陶澍所賞在臨
湘治巨蠹李弼祥在武陵築鴈湖八障在平江諭降賊
首汪敦族在開州平白馬白崖二洞山氓私鬪在平遠
誅賊王三疖庖於六歸河擢定番知州權婺川縣鄰盜
環伺苦戰數年四殄巨寇薦擢直隸州

賞戴藍翎年七十致仕歸

府志

羅超曾字芬餘吉水人道光進士浙江永康知縣以廉靜爲治邑人安之量移餘姚會南山蛟發水大至多方拯救民以全活築城修隄貧戶賴工以食舉卓異擢海甯州知州權知仁和縣卒

府志

黃贊湯字莘農廬陵人道光進士改庶吉士散館授編修累官刑部右侍郎提督福建學政道光三十年

文宗顯皇帝嗣統贊湯疏言自古經世之方端由慎德今日救時之要首在防夷外國犯順逾十載矣撫議已成修防仍懈試問疆吏戰守之法治安之謨恐仍茫乎未有見也書曰惟事事乃其有備有備無患況夷情貪詐反覆無常自今以往能保其必相安乎伏望當閒暇之時作綢繆之計密詢沿海督撫諸臣彼兵猝至何以應之求

請無厭何以杜之又其中最堪痛恨莫若漢奸外國得以進退自如深入不懼悉恃此輩援引主謀然逆用之爲彼羽翼順用之卽我干城必如何申禁招徠不至以內地人民爲外夷接應皆令各就地方悉心籌畫並卽令原議諸臣久於其任以責成效儻外國再肆要求以圖挾制禮諭不可德化不能在閩粵者卽令閩粵兵民勦之在江浙者卽以江浙兵民擊之勝算旣操事權有屬設有不虞

朝廷不必遣將而邊隅可期肅清矣又歷舉朱桂植撫粵林則徐督兩廣雖折馬頭燒煙土外國猶謂好官徐廣緒不準進城彼猶帖然畏服可見安邊撫夷全在官司公正華夷雜處終難久安宜皆責成地方諸臣爲未雨

綢繆之計云咸豐八年

朝廷再議戰撫贊湯時以二品頂戴任通政使復上請修
守備疏曰夫中國之御四夷也不外戰守撫三策歷來
議夷務者莫不以戰爲是以撫爲非而日日議戰日日
議撫迄無定局徒以有用之時日坐耗無益之議論我
日弛其防閑彼日增其備禦勢必戰撫俱窮而並不能
守臣請姑以戰恐之以撫緩之內則罷撫戰之議而專
以守爲策擇能守之人設能守之具預籌能守之財速
據能守之險夫需者事之賊震以恐致福值此內盜未
弭外寇並至正恐懼修省以迓天命之機愛惜分陰以
趨事功之日慎弗築室道旁日相持於戰撫紛紜之說
而反置守備於不修也九年出爲河東總督先是河決

銅瓦廂羣議挽河南趨贊湯巡視河道力陳治河之方
當因勢利導不宜強之使南又上鹽務變通策累鉅萬
言十一年冬再應

詔陳言請慎選內侍以杜非幾之貢同治元年調補廣東巡撫
甫莅任疏陳吏治民生甚悉

詔褒之廣東地故多盜大亂初夷餘匪未靖贊湯於水陸要隘
嚴置守備修復省垣東北面礮臺以禦寇警其先累典
文衡皆稱得士及官粵撫擒會匪治土客治效頗著尋
奉

召入都將行以病告歸數年卒子四祖纓舉人內閣中書祖綸

蔭生主事先卒

府志 繩其武
齋自纂年譜

劉繹字詹巖永豐人父振事母盡孝母盲百計求醫得

復明初艱於嗣年四十往贛購一妾始至詢知爲人養
媳也卽遣之明年遂生繹繹少好學有文譽道光十五
年一甲一名進士授翰林院修撰十七年督山東學政
試事竣入直

南書房

溫旨詢問家世

命侍父母居直廬一時以爲榮遇繹事親有父風二十一年乞
養回里主講鷺洲書院郡邑相隔百餘里每月必一歸
省以是爲常咸豐初廷臣交薦奉

召入京時振已前卒繹念母年高陳情歸粵寇犯郡奉母寓深
山七年襄辦團練

賞四品卿銜十年冬

特旨加三品京堂銜督辦團練大臣繹出入兵閒不辭勞瘁十一年母歿懇請解戎事

穆宗登極

優詔起用繹年已七十遂以老疾辭鄉郡邑修志繹皆主其事

巡撫劉坤一復延修江西通志光緒四年卒年八十二

著有存吾春齋詩文集三十二卷

府志 縣志 采訪事實 續輯

彭慶鍾

原名飛鴻

字錫之廬陵人道光進士改庶吉士授編

修轉御史咸豐初粵匪竄楚慶鍾上疏陳江西要隘請

置重兵防堵時有議入資充舉人者慶鍾極言不可出

為湖南知府以憂歸在籍練鄉兵仍起知永順府調岳

州復調長沙權鹽道糧道為政不私一人人亦不敢干

以私以勞績加運使銜

賞戴花翎引疾歸

府志

周立瀛字仙舫安福人道光進士官禮部主事累擢御史疏請清核捐納人員流品清釐州縣交代皆報可出爲福建漳州知府時粵寇滋蔓汀州不守立瀛進權汀漳龍道設防勦方略民賴以安尋遷福州知府權督糧道疏修內河裁陋規禁剋丁糧皆著善政再權延建邵道建常平倉修道南書院四賢祠文信國祠以母老乞養歸主講復古白鷺書院年六十一卒

府志

陳芳衡字月秋泰和人道光舉人工衡歷就督學聘遨遊四方所學益進晚舉孝廉方正爲學官

府志

李汝恢字開奉廬陵人父遠遊不歸汝恢年十三走川廣求父資盡而返措資再出徒步蠻煙瘴雨閒得遇於

貴州奉之歸母病癱瘓汝恢侍奉惟謹居兩喪悉盡禮以孝行

特旌

縣志

孫明字啟東泰和人少孤事母至孝服賈湖南資雄一鄉勇於行義獨數十萬金無少吝咸豐三年粵賊圍武昌明以金二萬進當事助軍餉不署姓名或詢其故曰吾承母遺訓非有所陳乞也於是江湘數千里皆知有孫孝子咸豐元年舉孝廉方正

府志

羅子璘字文江廬陵人道光鄉舉剛果尚義咸豐三年泰和奸民倡亂吉安知府王本梧戰歿子璘方倡團練約近鄉無與賊結五年粵賊石達開攻吉安子璘率祥和軍禦之會吉南贛甯道周玉衡進守吉安引子璘爲

助城圍急援師久不至子璘謂坐而待斃不如戰率敢死士三百餘人突出焚賊巢斬馘無算賊忿甚悉眾圍之子璘復奪圍出馬蹶墜地遂遇害賊裂其屍兄子璋以孝稱先戰死弟子瑜子琪六年吉安陷二人亦巷戰死丁壯殉者數百人

府志忠義錄

顏芳秋字蘭墅泰和人諸生咸豐初土盜鄒恩隆起芳秋率鄉人行清野法毘近數十邨無一人入逆黨者六年從官兵援吉安復泰和城明年賊由水東竄三關洞復犯泰和芳秋力扼之旋約諸邨擊賊於仙槎鄉賊敗走逐北至南坑陷賊圍遂自刎死陣亡練勇蕭溥蕭潼等三十餘人賊亦受創於是夜遁萬安

府志忠義錄

趙廷愷字存之一字子暨安福人父炳然官四川同知

以才謂爲福康安所知歷任繁劇而清苦自守及請老遂不名一錢廷愷年幼事父能極色養父病昕夕侍側衣不解帶事所生母邱尤摯敬初預計偕繼以大挑發東河皆不忍遠離邱敦迫再三始就道泊邱氏歿廷愷方在工次忽指痛告其從兄曰家必有故未幾而訃至矣服闋中咸豐進士授刑部主事旋回里佐當事辦團練遂不復出性方鯁嘗館究沂道署中某縣令以賄請卻其金而斥之在籍修縣志筆削嚴謹公論翕然詮釋諸經語錄河防武備俱有成書詩文集八卷已行世卒年七十有一

李文敏撰墓表續輯